


UTL AT DOWNSVIEW



D RANGE BAY SHLF POS ITEM C  
39 11 03 20 08 001 5

sp 15-11-66

DR  
507  
A4

'Alī, Muṣṭafa ibn Aḥmed  
Heft meclis

PLEASE DO NOT REMOVE  
CARDS OR SLIPS FROM THIS POCKET

---

UNIVERSITY OF TORONTO LIBRARY

---



HEFTI MECLIS

ÂLI (Kutub d'Albania)

کتابخانه اقدام

آثار اسلافدن

# هفت مجلیس

جنتمکان سلطان سلیمان قانونی حضرت تئریک صوک سفری  
اولان (سکتوار) محاربه سنه داتردر

مؤافی

کنه الاخبار صاحبی مورخ (عالی) مرحوم

طابع وناشری

اقدام غزته سی صاحب امتیاز وباش محرری

احمد جودت

معارف نظارت جلیله سنک فی ۲۷ جادی الاول سنه  
۱۳۱۶ و ۵۹۳ نومرولی رخصتنامه یله طبع اولمشدر

در سعادت - اقدام مطبعه سی

۱۳۱۶

عدد ۱۷ § بهاسی (۵۰) پاره

شرق و غربک ، اسلاف و معاصرینک آمارندن متشککدر





'Ali, Mustafa ibn Ahmed, 1541-159

کتابخانه اقدام

عدد ۱۷

Heft meclis آثار اسلافدن

# هفت مجلس

جنتکان سلطان سلیمان قانونی حضرتلرینک صوک سفری اولان  
( سکتوار ) محاربه سنه دائردر

مؤلفی

کنه الاخبار صاحبی مورخ ( عالی ) مرحوم

طابع و ناشری

اقدام غزنه سی صاحب امتیاز و باش محرری

احمد جودت

معارف نظارت جلیله سنک رخصتیه طبع اولمشدر

در سعادت — اقدام مطبعه سی

۱۳۱۶

DR  
507  
A4



1003958



( الله لطيف بعباده ) تجلت ذاته وجلت كلماته اولدم كه ( وجاهدوا  
في سبيل الله حق جهاده ) آيتي انزال وافهام و جهاد و غزا فرمان  
ذوالجلالی ايدوكن اعلان واعلام بيوردي تاجداران غزايشه و خديوان  
هدايت اندیشه اسباب امثالی آماده و صحيفه اعتقادی سخيفه شكوك  
و ظنوندن ساده قلوب كفار بدکردار، خذلهم الله تعالى الى يوم القرار،  
هر بار كه خراج كذار و اوامر اولوالامرله فرمان بردار اوليه لر اول  
طائفه فجره ( اولئك هم الكفرة ) زور بازوی جهادله پامال و نیروی  
غزاة حيدر نژادله مشوش الاحوال قيانوب عسكر جرّار كبجر الزخار  
بسيط ارضه روان و حضيض فتح و ظفرده نمایان اوله سنه رأى کشور  
آرای متین و افکار نصرت نمای رصینلری تعلق ایدوب مرایای  
( ان الله عزيز ذو انتقام ) مزایای چهره کشای صور اغتنام اولنجه  
تبغ شجاعتی درمیان و تیرتیز شهابی کمان بی کمان همترلنده بسته دهان  
ایدوب شیران کارزار و هز بران دشمن شکارله قلعه لرینی قلعه و خلعت  
راحتلرینی نزع ، خصوصاً تعمیر غامر و تخریب عامر سمتلرینه کوشش  
و ممکن اولدجه غیرت اسلام و عادات اولیای کرامه ورزش قیلینوب نشیمن  
حضور و پیرامن حبورلرنده سهامی طیار، سیوفی تبار، رماحی خطار،

طوب و تفنکی آتشبار ایتد کړندن ماعدا شیران مردم سر و هزبران  
 بشر پیکر رسم آسایشلرینی خاکستر و اسباب روایشلرینی زیر و زبر قیلوب  
 قلاع معموره الاطراف و ضیاع محفوظه الاکناف خراب و بیاب و کله  
 پرکله اوباش بی تاب زخم خورده سیوف آتشتاب اولوب جنود  
 نباله خطه شاحطه لرینی ویران و خشم حشم رحاله اماکن ساقطه لرینی  
 بی بنیان ایلمکدن خالی اولمیه .

( نظم )

خدایی که باور <sup>کریم</sup> فرمان او غزای شهبان محض احسان او  
 دلیران رستم کمانان جنک فشانند کان جناح خدنگ  
 هزبران سر پنجه کیران دین قضا پروان پهن دشت کین  
 همه زور بازوی و نیروی تن ستانند و خواهند ازان ذوالمنن

حقا ثم حقا بر قادر توانا و قوی کثیر العطا یاد رکه سلیمان مسند  
 نشین تخت باد آور داوریده مکین و کروه بی شکوه ضلالت قرین  
 مسخران خاتم نصرت نکین اولمه سی ارادت قدیمه و مشیت قویمه سنه  
 دائر دره لاسیما هفت مجلس سما و هشت بهشت مأوا سنای شباهنگ  
 و هفت رنگه پر نور و ضیای جباه غلمان و حورله بیقصور اولدینی  
 کمال قدرتندن پیدا و نوال معرفندن هویدا اید و کنده ریب یوقدر .

( نظم )

قدرتی خسته جسمه جان ویردی قوتی صحت و توان ویردی  
 روی زردیله سیم اشکه کوره هر نه ویردیه رایگان ویردی  
 کیمنی ایتدی شاه فرمان ران حکمتی حکمنه نشان ویردی  
 کیمنی قیلدی شیر پیشه جنک اله تیغ خونفشان ویردی  
 بیک ذهن اولسه یل کی چالاک ایدمه مز راه قدرتن ادراک



حمد بی تسطیر و نیایش خفی و ستیر هر وجهه تکثیر و حضور  
و خشوع ایله توفیر اولند قدز صکره

( نظم )


رسول قریشی ملیح الکلام      محمد علیه السلام التمام  
له العز والمجد والاعتلا      هو الشمس والشمس بدر الدجا  
کثیر الکرامات والمعجزات      نزولاً صعوداً علیه الصلوات  
خصوصاً بدر بدور صدور ، اولاد موفور الجور رضوان الله  
علیهم الی یوم النشور وازواج محصنات ، ارواح قانتات

( نظم )

املح اللهجه احسن المهجه      اجل الجبهه اکمل البهجه  
رضی الله ربنا عنهن      برضاء بدالنا منهن  
و چاریار کزین و اصحاب و احباب همنشین ، رضوان الله علیهم اجمعین ،

( نظم )

پس از نیایش و یک مجلس صلات و سلام      بیار باده کوثر سرشت و کوهر جام  
خوریم و در که وصف خدیو بکشایم      دوم ز مجلس بزم غزا بر آرایم



مجلس ثانی صاحب قران زمان حضر تلرینک انواع زیب  
وزینت و اصناف شوکت و عساکر بی نهایتله غزیم تلمری  
و منزل اولده استراحتلمری بیاننده در

بر صبح بهروز نورانی و روز فیروز انجم سستانی که مهچئه لوای  
نه رواقی بیداء مینای آسمانی پیدا و طراز سرفراز سبع طباقی فضای

سربلند ووالاده سروبالا کبی انکشت نما اولوب غمام کونا کون شفق  
مسیر شبرنگ و سرخاب خاکیه نظیر وقسطاس اشعه مهر منیر جلوگاه  
خضراده ظاهر و مستنیر اولمغله عساکر ملائک کروه زیب وزینتله  
آلوده و دسا کرارائک شکوه انواع کروفرله شوکت ربوده اولدقده  
اول شهریار کشور ستان و کامکار غضنفر توان ، مهر سپهر نصرت  
وسعد و ماصدق فحوای ( سلیمان نعم العبد ) اغنی به سلاطین غزاتک  
سرافرازی حضرت سلطان سلیمان خان غازی که ساحه بی مساحه همتی  
انظار چشمان توهمدن دور و باحه اباحه شریعتی اقطار تحریم و تحکمدن  
مهبجور، خصوصا ناولک کمان تدبیری هر بار عرصه گاه نصرت و غزایه  
پیوسته و کند صلابت مند ازدها تأثیری هز بران معارک و محاربه  
میان بسته قیلمغله زمان شیخوختنده شیرانه ورزشار و پیرلکی عالمنده  
جوانانه جنبشار ایدوب قرال دیدکلری بخت سیاه اغنی مقسمیانوش  
ضالالت کواه سرحد ( پیچ ) ده حرکت و مار پچا پیچ کی قصد کزند  
و مضرت قیلوب کفار بدکردار و بخار ناستوده کار کروهنی کله کلاب  
کی ارخا و اول حوالیده نوعا فساد و شناعت طریقه القا ایدوب  
سیلاب بیقرار وار مجرای طغیان و فتنه ده خاکسار اولدقلرنده غزاة  
اکناف و اقطار و قضاة اطراف و دیار چار ناچار ( جار ماجار ) دیو  
پادشاه هفت اقلیمه عرض و اعلان ( و اکثرها فیها الفساد ) فحوای  
شریفنی تلخیص و تفسیر و بیان ایلدکلرنده

( نظم )

بفرمود شاه سلیمان سریر	کند مشکبازی بنان دبیر
جیوش هز بران رومی کروه	بر آید بسختی چوالبزر کوه
دلیران درنده بار آورند	چوشیران غرنده کار آورند



بوموال اوزره میران نامدار و میر میرانان ذوی الاشتهار طرفلرینه  
 مناشیر ظفر نشان و طوامیر شهامت رسان انها اولنوب تنبیه محاصره  
 و پای بست محاصره اتمامدن صکره سرداران فرمان بران و سرداران  
 عتبه کیتی ستان فرادا فرادا ( افعل ما تؤمر ) صدرلرینی اصفا  
 صد دنده ایکن اول بادیار دیار شکار و شهنسوار ثمالک گذار سنه ثات  
 و سبعین و تسعمائه شوالک طقوزنجی کونی که پنجشنبه ایدی آفتاب  
 جهان کبی منزلی تبدیل و داراندوله السنیة محمیة قسطنطنیه دن  
 برج فتح و نصرته تحویل مرام ایدند ککر نده قبل طلوع الشمس  
 دستوران مدبران خمس اغنی شیر پیشه تدبیر و دایر پیشه ظفر مسیر ،  
 مصمصام قبضه جهاندار ی و ضرعام قله فرمان گذاری ، مشاطه عرایس  
 هفت اقلیم و زینت آرای مجالس عدالت نعیم ، محرم سرا پرده جاه  
 و جلال و اعلم سرائر سرادقات اقبال ، سزاوار مضمون ( فاتخذ و کیلا ) ،  
 وزیر کبیر آصف صفا ، حضرت پاشا  
 ( نظم )

باغ عدلنده پادشاهمزک طوغریدر سرو کبی واللہ  
 کوروب انک صداقتی صبحن عرض مهر ایلدی جهان شاهی

و دستور مسرور روشن رای ، وزیر منور درون کشور  
 کشای ، شمع بزمکاه فکر صائب و لمعه پراشعه نجم ثاقب ، نیر  
 برج ذکا ، پرتو پاشا و عالی مقام و شیرین کلام ، کوه وقار ، شکوه اعتبار  
 فرهاد پاشای نامدار و شمس سپهر کرم ، وزیر دلیر محترم ، شیر پیشه  
 نبرد و مشیر اردشیر هیجا نورد ، محمود فعال و ممدوح الحال احمد پاشای  
 خجسته خصال و پیر پیش قدم ارکان و چهره سای عتبه خاصه عثمانیان ،  
 حسیب دستوران بنام ، نسیب روشناسان کرام ، مسند نشین مجالس

اصطفا وزیر خامس مصطفی پاشا و فیلسوفان زمان و موالی نادره دان،  
 عمایم بزرگ و آستین سترک، لاسیا نعمانی لباس و جلادت و مهابت بقیاس  
 ایل به حسب المناصب قرارگاه رتبتلرینه راغب و بالجمله روشناسان و اکابر  
 کابراً عن کابر اول روز پیر و زده را کبلر و طلوع مهر سپهر سلطنته  
 مترقبلر، خصوصاً فرقدان سپهر فضیلت و مهر و ماه گردون نبالت،  
 حاکم محکمه دین و مقتدایان مسالک یقین اغنی بهما دو قاضی عسکر  
 بلاغت ادا و سائر علما و فضلاء و کبرا و عظماء، لاسیما ملاذ منشیان عوارف  
 و سرچشمه خدایکان عوارف، فصاحت شناس، بلاغت لباس، موقع دیوان  
 سلطانی اغنی به میرنشانی و نکهداران خزانه پادشاهی و محصلان اموال  
 نامتناهی، ارقام اشارت و اقلام استقامت سردارلر و کارگذار دفتردارلر،  
 و عالی پایه لر، همایون سایه لر، روشناسلر، زرین لباسلر، درگاه کتی پناهه  
 محرم لر، سربوبان اولان مفعملر، خصوصاً گردون مدارلر، بلند  
 اشتهارلر، مکرملر، وقورلر اغنی میراخورلر و حشمت دثارلر و صاحب  
 وقار فرقه لر اغنی پایه امارت ایرشمش متفرقه لر، کزیده لر، پسندیده لر،  
 کبیرلر، لازم التوقیرلر، چاشنیکی لر، خدمتگذارلر، صبارفتارلر، سراسر  
 پوشلر، زمره چاوشلر سیمدن بوزدغانلر و اوتاغه سرکرانلر ایله کنار کیر  
 طرف مسیر اولوب صرصر وار ذره لری تارمار و منظر آفتابی بی غبار  
 ایتک اوزره ایکن شیرلر، دلیرلر، دشمن کشلر، عدو زشلر، برق  
 جنبش لر، رعد غریبش لر، ببر بی امانلر، هزیر مردم ستانلر، تفنک  
 اندازلر، بلند آواز لر، زوین دارلر، سهمکین صدالر، مردلر،  
 جریلر اغنی یکچیریلر گروه اظهار شهامت و شکوه ایدوب صف  
 صف خرامان و طرف طرف گذاران اولدقلر ندن ضیغ توان، کرم  
 آستان، علی سیرت، ولی خلقت، کارگذار راست گفتار،



شیر پیشه و غایکچری اغاسی علی اغا گروه جلادت شکوه ایله آشکار  
اولدقده جوانب و حواشی زیر پای مواشی و صفوف کتائب مواشی  
کتاب زیب و زینته حواشی دوشوب یرلی یرنده و قرارگاه  
مقررلرنده

( نظم )

دیزیلوب اولّا تفنك انداز	هربری جنك ساز و آتش باز
هرتفنكك فتيه سی سوزان	صانهك اژدر شررافشان
یوتدی برچی هرتفنك اول	ایده کرمیتله تاکه جدل
التون اسكف باشنده الده فیل	هربری اولدی نوروناره دلیل
اولغیله فتيه آتشبار	کوییا باشند آشدی شعله نار
حربه لر جنك حربه هپ حاضر	خدمت نیزده دکل قاصر
توغلر باشد متصل لرزان	نوردن صانهك که سروروان
یرده یاتور قامو یتورمه لری	دوندی طاوس باغه جلو لری
چارطاقیله کیمی شویله یورر	باشی سان چرخ چارمی کتورر
اول قایشدن قوشقلرنده ییچق	حلقه ماری ایلمش ایکی شق

بواسلوب اوزره مستمر ( کاهم جراد منتشر ) پویان و دوان و گذاران  
وجلوه کنسان اولدقلرندن صکره کرم خیز ، ضیغم ستیز ، براق کام ،  
دلدل خرام ، زمان سرعت ، جهان زینت ، شرف پلهنك ، نهك آهنگ ،  
کرانمایه رخت ، جهان سایه بخت ، سپهر انتقال ، مه نونعال

( نظم )

ید کلرکه کرد سمندن هوا	براق بهشته ویرر توتیا
گذارنده دنیا کبی تند و تیز	خرامنده هریری عمر عزیز
شتا کونلرنده علف کهر با	بهار اولدیغنجه زمرد غذا

غلب ذلك توغدار وهای شوکته هوادار اولان صولاقلر مانند کونش  
آفتابه کش، بیکره قرین، نته که کواکب ثواقب چرخ برین، صف آرا  
و آیه کریمه (وجاء ربك والملك صفافاً) فحوای شریفنه ماصدق بی همته،  
کمانلری قبضه کاندن بعید و خدنک جان ستانلری پوته تصور و تخیله  
نابدید. بو حالت اوزره ناکاه افق سعادتدن بر مهر رخشان و مطلع  
هدایتدن بر ماه تابان فراز ابر شوکته پیدایا و اسد بر چنده کون کبی  
هویدا اولدی که ذراته زلزله و آسمانه ولوله دوشوردی و یاخود بر شیر  
ژیان پیشه زار مهابت ایچره نمایان اولوب خاکیه دهشت و عساکر  
بی کرانه خشیت ایرکوردی و یاخود بر سروروان شکوفه زار عساکر  
کرا زان اولوب جویبار بصیرتی سرکردان و شاخسار استطاعتی  
سرکران ایلدی. کبار و صغار و ابرار و اخیار و صاف جمال شهریار  
و مداح دیدار پر انوار اولوب (لاتدرکه الابصار وهو يدرك الابصار)  
تلاوتی تکرار و دهشت بی غایه لرینی بی شمار ایلدکرنده

( نظم )

لطفله هر برینه ویردی سلام	قیلدی رسم مروتی اتمام
نور دستارله اوناغله لری	سوره نور سطریری اولسه یری
جسم پاکنده خلعت دیبا	سمنه صالیدی صانکه مهر ضیا
زرکمر قدرتن عیان ایتش	نور بر طوقی درمیان ایتش
صانمه یاقوتلرله خنجر در	سطر یاقوته متن مسطر در
لعل و یاقوت ایچنده اول شمشیر	اولدی نخل شکوفه زاره نظیر
صانکه بر جویبار در مثلاً	ارغوان نخلی سایه صالمش اکا

خصوصاً مرصع لجام و هرای جواهر نظام، رخسار دلایل خرام  
وسمند هزبر انتقامی بروجهله تزین و نازنین و سهمکین ایلمشار که



کویا نهنگ بی پروا دریای جواهردن هویدا اولوب لعل و یاقوته  
مستغرق و الماسی شاقاقلری آینه‌دار نور مطلق مشاهده اولندی .

( نظم )

قطاس منور رسیده بخاک چوبرقی که بارد زافلاک پاک  
بقسطاس ابلق سمندکزین چواری بمهرشعاشع قرین

بوگونه زیب و زیورله آشکار و اول جیش طام ایچنده مهر طارم  
کبی نابدار اولدقلری حینده نفک اندازان هدایت قرین ( یوم یانی السماء  
بدخان مین ) سرنی آشکار و عیان ایدوب برآنده صواعق ورعد  
وبرق علو پردازنه رواق غرب و شرق واقع اولوب رزمگاه آتشنک  
شررلری اغنی اون بش بیک نفر یکچیری شادی کنان و تفنک اندازان  
اولغله

( نظم )

دوشدی آفاقه جنک زلزله‌سی چرخه ایردی تفنک ولوله‌سی

بو حالتده ناکهان توغهای هدایت رسان مرشد سپید ریش و سناک  
خیر اندیش کبی نمایان و کاکل پریشان اولدقلرندن صکره رایات زرین  
جهانبانی و اعلام سهمکین کشور ستانی مهجه تابنده لرینی اظهار و هر  
برینی رشک مهر و ماه نابدار ایلوب اغای محتشم، رایت آرای مفخم،  
اغنی به میر علم و کبرای کرام و عظمای ذوی الاحترام، مهرچارم قرین،  
شش جهات بین صاحب وقارلر، بلند اقتدارلر اغنی بلوک اغالری،  
علی الخصوص زمره مهتران و رامشکران خوش الحانان صدای شور  
و نفیر و نوای سورنای شوکت پذیرایله سمکدن سما که تحکم و زمینندن  
زمانه اظهار اشتهلم قیلدقلرندن صکره دلیران ابلق نشان وارد شیران  
ابلق سواران فردا فردا مجلا رخت، مصفا بخت، کاردان هیجا کران،

آهسته رو، قضا پیرو، تیر انداز، تیر کش ساز، افی کمان، دفعی نشان اغنی  
 زمره سپاهیان، مردلر، سحرانوردلر، فردلر، رستم نبردلر، جوشن پوشلر،  
 زره بردوشلر، مغفردارلر، شاهین شکارلر، ششپرز نلر، دشمن شکنلر،  
 یارارلر. گروه سلاحدارلر، ارسلان جنبشیلر، قیلان غربنشیلر، جنک افکن  
 رویین تن. سپرگیر، سپر تیر، سام سوار و تهمت تن علوفه جیان یسار  
 ویمین، غربیلر، مهبیلر، بی نهیلر، ناشکییلر، بی امانلر، جان ستانلر، نیک  
 خولر، جنک جولر، دلیران هزار، اشتهار غرباء یمین و یسار فوج فوج  
 نمایان، بلوک بلوک خرامان، صف صف گذاران، طرف طرف جلوه  
 کنان، غریوان و نعره زنان اولوب بیراقلری رنگارنگ و لباسلری  
 زربفت و سرنک، آتلی ترک تازده، زران دوده رختلری سوز و کدازده،  
 آلایلری کامل، کردسم سمندلری فرق فرقدانه واصل، لاسیا روشن  
 سراجلر زمره سراجلر، نکهبانلر، دربانلر، سر بازلر، رعداندازلر،  
 جبه جیلر، عربه جیلر و سائر خدام ذوی الاحتشام یرلی یرنده و جایگاه  
 مقررلرنده مانند سنین و شهرور مرور و عبور اوزره ایکن

( نظم )

سیره چیقدی قو کبار و صغار اولدی معموره هر سر دیوار  
 باملر قادر اولسه کفتاره یاردن داد ایدهیدی خنکاره

و بالمله رعایا مخزون، مغموم و سرنکون دغانی فزون ایدوب  
 (و این تذهبون) آیتی تذکر وازواج و اولاد و اسباط و احفاد  
 فراقی تصور صد دنده عساکر راکب مانند غمام متراکب حوالی  
 شهردن باغلر کنارینه قریب و تراحم و تقادمین ناشکیب اولدقلری کبی


( نظم )

ظاهر اولدی اوتاغ سلطانی سیم بر قلعه طوتدی میدانی



سایه نه سپهر ایدی غالب که ملائک پر ایدی هر جانب  
هر طنابی شعاع مهره بدل نه فلك دینسه اول اوتاغه محل  
چونکه خاتان داد کستر اول بروج پر نوره گذر و جمالی ماهی  
غلمان پرده نشینه منظر بیوردی ارباب نظر ( فاذا برق البحر  
و خسف القمر و جمع الشمس والقمر ) تلاوتی مکرر و دوام دوات  
شهریاری دعا رینی از بر قیلوب یقین و بعید ( ذلك يوم الوعيد ) دیو  
منزلارینی جویان و غریبان و تحیر کنان اولوب کیتدیلر .  
( نظم )

کیردی سمین خیامه عسکر شاه خیل کتوب نوری قیلدی پناه  
هربری فکر ارتحال اوزره سفر امرینه اشتغال اوزره



مجلس ثالث سلطان فرمان راز حضر تلرینک مراحل و منازلده کی  
اجالالی و بخت و دولت و سلطنتک اقبالی خصوصاً وزیرانک  
الایلی و ابتداء جنکده کی آرای نصرت آرا لری بیانده در

ینه بر کون که مهر نورانی چکدی زرین لواء سلطانی  
کویسا اولدی نور شعشه سی توغ زر رشته موی خاقانی  
صانه سک صور ایدی صدای نفیر قیلدی بیدار خیل انسانی  
باشلادی های و هری زمزمه یه عسکر ملکیت سلجانی

اغنی که سلطان عالی کیش و صاحب قران بلند اندیش مانند  
دسا کر پیشا پیش اول عسا کر بیشا بیش ایله بدرقه همت ذمت کشور -

ستانه رهنا و سبیل جبریل دلیل رأی جمیلنه پیشوا اولوب اطراف  
واسعه تکاپوی جیش زخارینه تنک واکناف شاسعه سم سام سوارانله  
شکسته حال وبی درنک اولغین طی منازل رحلت ساز و قطع مراحل  
نشیب و فراز اوزره فسیحه الارجا، صحیحه الهوا صیدگاه سلطانی، شکار  
ستان خسروانی اولان عروسه عظیم القدره وصول مسعود، اغنی  
حمیه بهیه ادرنده نزول معهودلری میسر اولوب کافی الاول تراجم  
و نقادام مکمل بلکه اتم واکمل، تراکم و تهاجم محصل اولوب قطان  
حوالی نشین و سکان خطه کزین دیدار بهجت آثار شهریاره نظر  
و آثار اجناد رستخیز اطواره صرف بصر قیلد قلرندن ماعدا اوچ کون  
تمام شرف نزولیه شاد کام و سعادت عالم شمولیه مسرت انجام اولمشلر  
ایکن های همت کیتی پناه ذروه رتبت عزیمتی پروازگاه ایدینوب  
مرور ایامله صوفیه نام قصبه غنیمت انجامده آفتاب کردون مقام کبی  
برکون قرار و آرام بیوردقدن صکره ماوراسی که، دلیل سبیل غزا  
و سبیل دلیل مقصد اقصادر، ارتحال ظفر نوال وانتقال سفر مال  
اوزره کار کرپولاد کمر، چرخ بنیاد نصرت آباد، اغنی قلعه بلغراد  
اوکنده رفع خیام و نصب اعلام قیلینوب ایکی کون تمام قرار و آرام  
عقبنده

( نظم )

خسرو لشکرکش و نصرت نکین      شاه جهاندار و سلیمان نشین  
کرد بدریای عسا کر خروش      زمزمه پرداخت بروی زمین  
کشت لکد خورده پر خاشیان      خاک زمین زیر زمین کزین  
پومنوال اوزره (زمین) دیمکه معروف بر جایگاه موصوف مأرای خیول  
رحاله و منزاکاه جنود نباله، خصوصاً اوتاغ شجاع طناب سلطانی



نمودار قباب آسمانی اولمغله عساكر دساكر ربع مسكون خيزاب  
تموجدن قورتلش دريا كې سكون و مراكب ستور و خيول و هيون  
صحاري تحمل و تنعمده كندولري راحت نمون ايليوب هر وجهله  
استراحت و معاشرت اقامت مقرر اولديني كونده راه سعادت كواه  
سلطان زردپيم عصاي موسي كايم كې بردرياي بي كراني دونم  
و قلوب مرعوب ذوي الاحترامي اما كن حيرت و عبوديتده صدقه  
مقيم ايليوب شاهبازان سرحد روم و سربازان هزاران هجوم كينه دارلر،  
دشمن شكارلر، بير جنكلر، پلنك آهنكلر، كوجكلر، كرچكلر، شير  
نرلر، اركلر، فردلر، سردلر، رستم نبردلر، تهمتن تئلر، اعدا شكنلر،  
آهن بدنلر، قوي جوشنلر، يلكن پوشلر، درياخروشلر، ميدان غزائك  
دلاورلري، اعني روم ايلي عسكري آلاي آلاي صف آراي و هيت  
نماي اولوب بير بيانلري بردوش و جرسلري پرصدا و خروش،  
نيزه لري خطار، جرأت ستيزه لري آشكار، قول قول اولمشلر، صاحب  
قران غازينك بر نگاهنه قول اولمشلر، على الخصوص بر بدر منيري  
و بر شمس فلك تدبيري دو كنا ايلمشلر كه

( نظم )

كرمه حيدر كراردر شيمده عمر سخاده بحر كهر باردر اكا همسر  
بزمده رزمده اولدر پياله كيرودلير عجمي دوشسه اياغينه نجه يوزيك شير  
اعني ماه سپهر رتبت و آفتاب فلك منزلت، جم بزم، كستم رزم، آصف  
آصف را، روم ايلي بكلر بكي سي احمد پاشا گروه نصرت شكوهله  
هويدا و شكوه مشكور شوكت گروهله رونما اولوب بروجهله آلاي  
كوستردى كه چشم احوال نظيريني كورمش دكل و دور دیده ور بو گونه

زیب و زیورہ ایرمش دکل . القصہ دیدار مسرت آثار سلطانی مانند  
آفتاب درخشانی ذرات وار اول گروهی غربیق انوار و سلام عنایت  
نظامری ایله کار مکار بیوردقدن صکره بر فوج دریا موج و صفوف  
والافرج دخی ظاهر و آشکار اولوب دوات یار، سعادت دثار، عالی  
رأی واعالی مدار، میرمیران قرامان سلیمان پاشای کامران و عسا کر یجد  
و گروه مور عدد، اغنی سهمکینلر، صحرا نشینلر، کوته ریشلر، دراز سبتلر،  
عدو کیشلر، درشت خلقتلر، زند تنلر، جوشن بدنلر، شکار یلر، باد  
یار یلر، بیابانیلر، قرامانیلر منظور انظار همت شعار و مسرور اسرار  
عنایت آثار اولدقلرندن صکره روی زمینه اغنی دشت زمینه قدوم  
هایونلری میسر و ترتیب دیوان و تقدیم ارکان و روشناسان مقرر  
اولوب امرای مسیحیه نك ممتازی و کبرای عیسویه نك سرفرازی له  
بکلرینک اولوسی، چه دلاورلرینک یوزی صولوسی قرال بن قرال اردل  
اوغلی دیدکاری روشن حال اغنی قرال استفان ارشده الله تعالی  
الی نهج الایمان لقاء صداقتی خك عبودیتہ القا وروی استقامتی  
بسیط اطاعتہ انہا قیلوب بو مقوله لره انعام و احسان عادات کریمہ  
شہریاران اولمغین پای سریر سریر سمیره چہرہ سای و سزاوار خلعت  
موہبت کشور آرای قیلندقدن صکره هزار اسرار ظفر شعار و آثار  
نصرت دثار اعلامی وعید شریف اضحی وروز چشن مسرت فزا ایامی  
گذران اولنجه اون کون تمام اوتاغ معمر خیام وخیام موقر ختام  
وادی توقف و آرامده بردوام قیلنوب عاقبت ماوراسنه عزیمت و دریای  
بی نہایت کبی ریا ح رحلتله حرکت اولنوب طراوه صوی که ،  
هروجه طراوت کواہ و آب روی جملة میاه اولمشدر، دریا کبی روان  
ایکن قوس قزح نشان بر جسر عظیم صراط عنوان بناسی ایچون



زینت ساز رواق تدبیر، اساس انداز طباق همت مصیر، سواد اهتمامک  
 همامی، دولت آباد اقدامک بلند اقدامی (من حیث لایحساب) اتمام  
 مهام انامی مکتسب، هزبر پیر هیئت وغا، یکپچری اغامی علی اغا  
 مقدمجه کوندرلمش ایدی، سابق الذکر اوسک کوپروسی بناسنه امر  
 عالیشان ویرلمشدی. بر مقتضای فرمان بزرگ ورای عالم سترک اول  
 سیل دریاخیله روان وجسر سر برطاق بناسنه همتی جویان اولوب  
 ماه چارده مثال اون دوت کون مقداری عرض کمال و تکمیل تقمان  
 بنایه اتمام بی همال اتمکله طولاً دوت بیسک ذراع و عرضاً بش  
 ذراع بی مظالم و نزاع بر جسر بلند و صراط چرخ پیوند بنا اولندی که  
 (نظم)

قوس قزحله آنی بر یردن ایتسه لر عرض

هرکیم کور رسه دیردی بین السماء والارض

وبالجمه دنیا صراطی دینسه جائز، فتحه سندن خاتمه سنه عازم اولاندک  
 دیلرنده (اهدنا الصراط المستقیم) تلاوتی بارز.

(نظم)

تا کیچنجه عساکر سلطان چکدی اول کوپری نیجه بارکران  
 خیلی مردانی درکنار ایتدی کچوروب دیده دن شمار ایتدی

بوحالات بشارت دنار وساعت سعادت شعارده. قوت قاهره جهانپناهی  
 و صلابت باهره زمان دستکاهی مقارنتیله تا بحر محیطدن اول سیل  
 بسیطه وارد وابتدای خلقت آب و خاکدن انتهاء استدارت افلاک  
 وارنجه تصویری و تخیلی فاسد و کاسد اولان امور نادرده دن بوحالته  
 عجیبه و واقعه غریبه سمت ظهوره و سمط شعوره کلدی که پای تخت

عایه محروسه قسطنطنیه لیانک آهن لنگر، تنین پیکر، دریا رو، هوا پیرو  
 خاصه قادر غه لرندن ایکی پاره کشتی بونجه بوادی ودشتی گذران  
 اولوب اول جسر عظیمک کمرلری منظرینه گلشیر، اساس مرخم  
 لباسنی کورنجه تحسین و آفرین بحرینه لنگر صالمشیر، خصوصاً شب  
 تاسحر مشاعل نورانی وقنادیل درخشانی برله کندولری طونامشیر  
 کویا که آق دگزک طونامه سی یانار اود کبی کفار روسیاه قلعه لرینه  
 جان آتمشیر. شهر یار دریا گذار ایسه سرچشمه زلال نسی حضرت  
 نوح نبی کبی کشتی نشین وعظمت وجلادت مکین اولوب دگز مالکی  
 کبی دریای درکنار واول دریاچه کوهر شکاری مکنت وجلادته  
 عبور وگذار ایلدکلری حینده

( نظم )

دیدي هر کس اول آفتاب اوزره در شهوار چيقدي آب اوزره

ماحصل کلام، جنود سپهر انتقام مرور و نزول و عبور و دخول ایدره رک  
 نتیجه اشکال مسافرت و دریچه دریچه فتح و نصرت اولان حصار  
 نامدار و بروج سپهر اشتهار، اغنی قلعه استوار (سکتوار) اوکنده نزول  
 ایدمه جکلری کون اول اول مدبر امور جمهور و متمم مهمام امور،  
 واسطه نظام انام و رابعه مرام ذوی الاحترام، کریم الشان، عظیم العنوان،  
 عقده کنای سلطنت و جهاننداری، راحت افزای رعیت شعاری، امن  
 و امان چراغک وقادی، زمین استمانک معتادی، قطب سپهر جهان  
 پروری و محور فاک داد کستری، مرکز دائرة عظمت و کامرانی  
 و سرچشمه فرادیس جلادت و زندگانی، وزیر اعظم و معظم، مشیر  
 افخم و مفخم، اغنی به حضرت محمد پاشا رفع الله رتبه بحیث مایشاء  
 صاغ قوله آلاي والای ولایت نمای کوسرتوب بروجهاه قولارین



ترین و قوللری زیب و زیورله سهمکین ایلدیلر که اسکف زورینک  
شعاشی اشعه آفتابی نایاب و بسیط خاکلک لوامی کواکب رخشنده بی  
زیر نقاب و پرده نشین غمام و سحاب ایتدیکندن ماعدا دستار پوش  
اولانلرک اوتاغلری پرختو کبی عالمی استیعاب ایتدی و ایلق سوار  
اولانلرک ظلال باقی خورشید تابنده بی ماورای سحاب توهمه ایتدی.  
( نظم )

برکروهی اولوب مجوزه پوش صوقدی بائینه ارغوان نخلان  
طوتدی سلطان بورکی صحرائی کوردیلر میر عاشقان نخلان  
خصوصا کونا کون بیراقلری آچلدی ، کویا سپهرک بولوتلری پاره پاره  
بسیط خاکه صاچلدی . لاسیا

( نظم )

قرمزی اسکف اولدی بی پایان طوغدی رج شفقده مهر جهان  
کیمی کیمش توغلفه سن باشه طورر اسکفله نیته کیم باشه  
نیزملر ایسه سرفراز و شهاب ثاقب کبی شعاشعله ممتاز، ترتیب آلاهی  
و تزین عساکر ظفر نمای سرحد اعجازه واصل اولدقدن صکره ینه  
بو قولده فرقدان برج سطوت و اجلال و مهر و ماه اوج عظمت  
واقبال . مشیران سلطان هفت اقلیم ، وزیران خاقان زردیهم ، دستوران  
بلند اقتدار ، وزیران سپهر اشتهار ، اغنی هما بو بکر فطنت ، عمر عدالت ،  
فرهاد پاشای عالی رتبت ، عثمان شیم ، حیدر کرم ، دستور محترم احمد  
پاشای محترم . اما صول قولده دستور نادره دان ، وزیر مشیر کامران ،  
خانقاه سعادتک پیر یش قرمی و جایگاه وزرانک کاردان مفتخمی  
وزیر خامس مصطفی پاشا لازالت محبته عن الحشا و میر میران بنام  
واعظم عظماء ذوی الاحترام ، شیر صولت ، پیر خصلت ، جنک افکن

وصف کشا مصر بکمر بکلیکندن معزول اولان علی پاشا فرادا فرادا  
 سیوف نما و صفوف آرا اولوب مغفر سر، جوشن پیکر، اسکف پوش،  
 زره بردوش بیراقدار دشمن شکار اولان قوللری و قوللری بروجه  
 زینت مسیر و شهرت پذیر ایلدیلرکه آن رکوبدن زمان نزوله وارنجه  
 آلایلری بربرینه متصل و اطراف شاسعه نظرگاه جهانده مضمحل  
 اولمشدی . ناکاه برقلعه شهر اشتهار ظاهر و آشکار اولدی که خطه  
 حیاطه سنی جزایر بحر محیط کبی آب روان احاطه ایتش و هر جانی  
 لجن کردابی اولغله مرور اولنه جق یوللری بی نشان اولوب کیتمش،  
 خصوصاً بر طرفی باتاقلی نیستان و برجانی خارستان و چنکستان  
 اولدیغدن ماعدا ایکی قات پاروقان و میاننده بر حصار فلک بنیان که  
 حصولی بادی نظرده صعوبت شعار و دخولی باد قدرت و اقتداره  
 محال و دشوار ایدوکنده اشتباه یوق . سنه اربع و سبعین و تسعمائه  
 محرم الحرامنک یکر میسنده و تاریخ رومیدن اغستوس آینک بشنده که،  
 ایام سمومیه نهایتی بولمش و ساعت روز علی الحساب اون درت اولمش  
 ایدی ، عساکر جرار مانند نجوم تابدار لباس زر بفت و زرکش  
 و کرباس فاخر و منقش لری کیوب آیین زیور معارج اعجازدن برتر  
 و ستوران زر رخت و سلاحداران مساعد بخت بیدای شوکت  
 و شهادتده جلوه کر اولدقلرندن صکره صاحب قران زمان و زمین  
 و سلطان فرمان ران سلیمان نکین مرایای شکوهمده نمایان و مزایای  
 جلالت قرینله مشارالیه بالبنان اولوب سائر تحف کران مقدار ویشمار  
 رخت زرنگار جواهر دئاردن ماعدا زر رشته دن ساخته و هر رشته سی  
 شعشعه مهرله پر داخته بر قطاس نورانی و قسطاس خسروانی  
 طاقمشرکه هر کورن نکته شناس بسیار حمد و سپاس ایدوب ( و جعلنا



له نوراً یمشی به فی الناس ) آیتی رسائل اوصاف و مدایخنده اقتباس  
ایدز لرکن ناکهان خذله بار و نشینان بسیط خاکده بر مهر درخشان  
کوروب آیا آفتاب عاتق عالم غبرایدمی ایتمشدر و یا سرچشمه نور  
وضیانک بو صحراده عینیمی بولتمشدر دیو تصورده و بعضیسی عجیب  
قطاس شاه هفت اقلیم و یا خود رکاب پادشاه مرصع دیهم میدر دیو  
تفکرده ( ولیکن اکثرهم لایعلمون بل هم فی شک یلعبون ) و الحاصل  
زمره کفار بدکردار طریق توهم و تخیله خاکسار اولوب ( هذا  
شیء عجیب ) فحواشی اظهار خوف و خشیتلرینی یشمار ایتک صدند  
ایکن اول جیش طام و دایران هزار انتقام محاصره امرینی آتام  
و اول قلمه نك جزیره دریا کبی استیعابنه اهتمام ایدوب شهریار  
دارادارات و تاجدار سکنند مرآت اول حصار بنامک جانب  
شمالینده کی صحراده نزول هایون و آرام بیوردقدن صکره اول قبیله  
بد کردار ( فیومئذ وقعت الواقعة ) مضمونی تکرار و تکرار ناستوده کار  
( یومئذ این المفر ) فحواشی آشکار ایتک اوزره ایکن دستور مسرور  
کشورکشا، وزیر ثالث فرهاد پاشا و ذوالقدر و الاقبال، مهر سپهرجاه  
و جلال، زال نبرد و رستم نورد، ملک الامراء، ملک العظماء، اناطولی بکلر  
بکیسی محمود پاشا ایله بی باکلر، جست و چالا کلر، هیجا کلر، و غا کذارلر.  
سپر پناهلر، ششپر دستگاهلر، کار زارلر صاغ قولی اغنی عسا کر اناطولی  
جانب جنوبینک غریبینی درکنسار و نسیم شمال کبی معارک و محارب  
فضالرینی کذار ایتدکلرندن صکره وزیر حسیب، مشیر نسیب و ادیب  
بنجه کیر دایر، شیروغا، وزیر خاس، مصطفی پاشا و برادر مهتری و روم ایلی  
غازیلرینک سروری جنک افکن وصف کشا، روم ایلی بکلر بکیسی  
احمد پاشا زیر دستنده اولان عسا کر نصرت قرین و سر بازان

شاهراه دین ایله جانب شمالیسندہ دامنگیر جنک و پیر امن مسیر  
 قصد و آهنگ اولوب لاسیا پادشاه کشورستاندن مقدم واروب قلعہک  
 جانب شرقیسندہ کی چنکاستاندہ ثابت قدم اولوب دائرۂ قلعہدہ کی  
 صوبی کسمشار و سمت آخرہ آقیدوب مجارینی خشک و یابس قیلمشار  
 ایدی. بودقمہ دخی برقرار و بنیان مترسہ خدمت گذار اولدقلرندن  
 صکرہ جانب شرقیسی، کہ فرهاد پاشا ایله روم ایلی قولینک مایینی در،  
 دستگیر باغ یکیچری اغاسی علی اغا ایله گروه مہیب و جنود بیہیب  
 قدمای عساکرک سر دفتری، اغی زمرۂ یکیچری مترس ساز ورعد  
 آواز اولوب

( نظم )

هر تفنگک قتیلاہسی سوزان      کندولر برچاقم قاو اولدی ہان  
 بقدیلر صاغلرینہ صوللرینہ      غیری قوللر قول اولدی قوللرینہ

و بوفرقتک شرقیسندہ و فرهاد پاشانک غربیسندہ غزاة بحرک دریادی  
 و دریا شناسلرک بی معادلی، میرکار آزمودہ ودلیر بسیار سنتودہ  
 غازی، پیروستک قوجہ ایلی سنجاغی بکی علی پورنک و سرحد  
 بکلرینک ممتازی، امرای غزا پیشہنک سرفرازی پرخاشانک ارککی،  
 پوجہ سنجاغی بکی بومنوال اوزرہ درت قول معین و ممتاز، مترس  
 ساز و طوب انداز اولدقلرندن غیری جنود غزاة سرحد و جیوش  
 منصورۂ لایعد دلاورلر، پیکار کرلر، جنک پیشہلر، نبرد اندیشہلر،  
 قہرمان کارلر، شبخون گذارلر، اغی بودیم عسکری ایله عالی قدر،  
 ذوالعز و الصدر میرمیران نامدار، مشیر عالیشان بلند اقتدار، عطا بزمک  
 خاقمی، سخا صدرینک صدر محترمی، تدبیر بحرینک دریکتاسی، ارباب  
 لغف و احسانک انکشت نماسی، انعامی وافر، احسانی متکثر




کرمی صانکه اولدی بحر محیط ربع مسکونه هب سرائی وار  
یالکز کسه کورمدی لطفن بر غریبه هزار همتی وار  
ذات پاکنده ختم اولوبدر جود حد و پایانی یوق مروتی وار

میرمیران دانا بدون بکلیسی مصطفی پاشا که ، سابق الذکر وزیر  
اعظم حضرتلرینک اقرب افر باسندن واول دودمان سعادت آشیانک  
شاهین کبی صلابت نمانسنددر، عهدنده ارباب معارفدن کسه یوقدرکه  
عین انعامله نظرلر ایلیمه ، مکرکه کورمیه وعصرنده اصحاب لطایفدن  
شیمی قالمشدرکه انواع التفاتنه مقارن قیلیمه ، یامکرکه ایشتمیه . حقاً  
برذات شریفدرکه هرنفسده احسان اوزره اولسه خاطر عاطرنده  
حضور بولمز و برشان لطیفدرکه بردمده بیک همه دسترس بولسه  
باطن و ظاهرلرنده سرور کورمز . حق سبحانه و تعالی اول وجود  
پرجودی معمر و چراغ رفعتن کوندن کونه کون کبی منور و نور  
دیده لرینی نور عزت و کیاستله انور ایلیمه . وعموماً عسا کفر قرامل ایلیمه  
سلیمان پاشا قرال ضالک سمتنه مقابل اوستون بلغرادی اوکنده نازل  
اولدقلرندن ماعدا میرلوای عالیشان کوستندیل سنجاغی بکی محمد خان  
سکتواره جاری و مرور و عبوردن عاری اولان ریکسه نام بتاقلی  
صوبی کچوب و فرهاد پاشانک ماوراسنده و بوبوفچه طرفلرینک  
احتمال خطر اولان محازی ویداسنده قراول طریقله کشت و کذار  
و کندولری کار آزموده پیکار ایدرلرکن بوجانبده کفار خاکسار  
بروج سکتواره بیقرار . خصوصاً هر بریسی خاسر و خائب ( ویتقدقون  
من کل جانب ) لاسیا هراس و یملری غالب ( ولهم عذاب واصب )

( نظم )

کوره لم عاقبت کار نولور اهل اسلامه کفار نولور  
ایچسون اول شاه جهان آب حیات دوشمسون روی زمینه ظلمات



مجلس رابع ابتداء جنگ و پیکار و ازدیاد کرمیت کار زار  
خصوصاً فتح پاروقان و هزیمت اعدای خسران نشان بیاننده  
و پر تو پاشانک جنگی و کوله قهقهه سنه آهنکی اعلاننده در

( مثنوی )

چو آیین هیجا بیابان رسید صدای شپوری بمیدان رسید  
هزیران مرد افکن، پیل تن دلاور دلان تهمتین بدن  
زرعد سهمکین برقی دلیل ز مردم تهی همچو کردون سیل  
چنین کرم شد دود گاه نبرد نه در چرخ پران نه در خاک کرد  
بومنوال بی همال و اسلوب غذا مأل ایله آتش فشان، اژدردهان،  
رعد فغان، برق نشان، شرر کستر، ثعبان پیکر، صف شکن نبرد افکن، جنگ  
جو، پر خاشخو، بی امان، جانستان، دورین آتش نشین، مرمر غدا، آهن  
قبا، ضرب زن، حرب کن طوپار، پر آشوبلر طعن طاشلرینی پرتاب  
و بروج قلعه‌ی خراب و بیاب اتمکه باشلیوب رعد اندازان بی سرقتیل  
ماز پیکر لرینی پر شرر، خصوصاً پیغه جهادی سوزان و کبریت حرب  
و ضرب و کشادی شعله‌ستان ایلیوب کفار ضالین، لهنم الله الی یوم الدین،  
هراس و جیله غمناک و فراز قلعه‌ده غراب روسیاه کبی بهمنک اولوب



صاغ و صولدن و باجمله هر قولدن ضرب تام و حرب خسارت انجام  
ایله کفره نی مغبون و منکوب و مغموم و محزون طوبه دگمش میمون کی  
حرکات بی مال و آتش ندامت لرینی اشمال اوزره ایکن

روم ایلی عسکرینک مردلری کیمیی نعره زنان کیمی جری  
کوستروب قوت بازولرینی آغدیروب دیده ترازولرینی  
جان آتوب قلعه یه قرشوهر مرد قیلدیلر طوب و تفکیله نبرد

علی الخصوص مترسیرینه محازی اولان دیوار اوچ قات حصار و بروج  
سهر برین کی استوار اولوب لجن آبدار و اشجار چنزارله بنا قیلمشیر  
وژنک فکرت حرب و ضربی مرایای طبیعتلرندن سیلمشیر . حقا  
بروجهله محکم و مشید و مستحکم اولش که وارن طوپلری طیش  
پاروقاتی کچه مزدی و عادت مألوفه سی اوزره اقالیم جنک وجداله یول  
آچه مزدی . پاروقن مذکورک قدی طولاً اون ایکی ذراع و عرضاً  
بش ذراعدن زیاده اولوب اما کن مهاد کفره و مساکن مشیده  
فجره دروننی استوار و قات قات حصار ایلیوب بواسطه حکامدن کرکی  
کی اطمینان بولمشیر ( ولو کنتم فی بروج مشیده ) فحواسندن نادان  
و غافل اولمشیر . آخر الامر سطوت هیبت خسروانی و مهابت صلابت  
سایمانی سنه اربع و سبعین و تسعمائه محرم الحرامنک یکرمی انتجی  
کونی اول عفاریت ملاعینی تالان و طیش پاروقانلرندن خواه ناخواه  
کریزان ایلیوب غازیان شیر جنک و دلیران ارد شیر آهنگ ، اعنی روم ایلی  
عسکرینک سر افرازلری و محارب و معارک عرصه کاهنک سربازلری  
مهاجمه جم غفیر و مجادله جلاوت مصیر ایله بزمکاه خرددن یادلر  
واول خر کی خور یادلردن آلتی یوز نفر دشمنی کشته و طیش

پاروقانلری ایچندن پشته پشته قیلوب باعث اطمینان اولان کینکاهلرینه  
 هزیمت آتشی براقیدیلر . لاسیما کفره فجره ضالین ، خائفین و خائنین  
 ( فاصبحوا خاسرین علی ما فعلتم نادمین )

( نظم )

آیت فتحه ابتدادر بو جنب فتاحدن عطا در بو  
 آغلسون قانلی یاش دوکوب اعدا خیلی نادیده ماجرا در بو

اما دستور دانا، مشیر اقلیم کشا وزیر ثانی پرتو پاشا که پادشاه عالمپناه  
 وظل الله انجم سپاه حضرتلرینک پای تخت سنیة محروسه قسطنطنیه دن  
 توجه هایونلری واقع اولمزدن ایکی کون اول که روز دوشنبه ایدی  
 امر عالیشان و فرمان ظفر نشانلری مقتضاسنجه سربازان دشمن  
 شکار و سپاهیان نصرت شعار، اغنی زمره علوفه جیان یسار و دلاوران  
 شجاعت قرین و بهادران شهامت رهین فرقه غرباء یمین و تفنک  
 اندازان و هیجا سازان هربری جکر در و جری ایکی بیک نفر یکچیری  
 والحاصل بو مقدار عسا کر نصرت مأثرله پادشاه جم جناب درگاهندن  
 مفارقت و فرمان جهان سستانلری اوزره کوله قلعه سی فتحه عزیمت  
 ایلمشیر ایدی . بعدزان دشتیان تیر اندازان و بریه کیران ایلاغار ساز  
 سواران یغما پرستان و تاراجیان وادی نوردان، اغنی تاتارخان طرفندن  
 کلن عسا کر بی کران و سابق الذکر کزیده بی اردل و اطاعت  
 و انقیادله مکمل اولان قرال استفان ایله خوریادان اطاعت کران و افلاق  
 و قره بغداد طرفلرندن و اصل اولان قازاقلر و و یوده لر و یوناقلر  
 عموماً پرتو پاشا جنبه هیجا کران و فرمان بران تعیین اولندقلرندن  
 غیر شجاعت شعار، شهامت دثار میرمیران طمشوار، مصطفی پاشای  
 کامکار ایله زیر دستنده اولان غزاة جنک آموز و دلیران هیجا فروز



سرتا پای معرکه آرای اولوب کوله قلعه سی فتحه مترس ساز و بعض  
قلعه لر و برج لر گرفته اساس انداز اولد قلرندن ماعدا

( نظم )

کرم اولوب هر طرفده آتش جنک اوتن آتشدیرردی طوب و تنک  
تیرلر خود کمانده بسته دهن نه سپردن دوزر نه جوشندن

والحاصل عسا کر صاحب قران زمان جنود بی کران حضرت سایان  
کبی جوشان و خروشان ژرف ژرف خدنگ اندازان و طرف طرف  
جنک سازان اولوب کثرت خدم و خشم و وفرت دایران بی آدم  
دریا مثل اول طرفلری قرین غوطه و خیزاب ایتشدی و کره زمین  
اوطوفان قیامت نشانده بی نشان اولوب کیتمشدی . قما استدعاء  
فکرت و عقول و اقتضاء کثرت و نفوس خیول موجب محض قحط و غلا  
و ضد وفرت و غنا اولمش ایکن اول وزارت و فراست مقامک صدری  
و عدالت و دیانت سهرینک عالی قدری ، استقامت بوستانک سروبالاسی ،  
جلالت و جلالت بهشتک طوباسی ، تدبیر فداکارینک آفتابی . تبشیر  
ملککرینک کردون جنابی ، باعث نظام هفت کشور ، متمم امور تخت و افسر  
( نظم )

سری مرآت ملکک روم نقی ثقاۃ شاه مخدوم

وزیر کبیر کشور آرا سمی رسول حی ودانا

اغنی حضرت محمد پاشا اللهم ایده کما یشاء آثار قحط و غلانی غلا  
واطوار رنج و عنای محض غنا بیوروب

( نظم )

تدبیر دلپذیری غنا و یردی عسکره

زاد و زواده بحر اولوبن آقادی هریرمه \*

آتلر بر آرپه آغری غم و غصه کورمدی  
خاک غلایه غله و آرپه یوز اورمدی

اولدی زحیر رنجی کبی قحط بی نشان  
کیمسه ذخیره زحمتی چکمدی عیان


بوندن ماعدا ترتیب آلائی و تزین عساکر نصرت آرای خصوصنده  
دخی تیر کان همتلری شهاب پرضیا کبی سمای استمالنه و اصل اولمش  
و شمشر قبضه شجاعتلری آفتاب سها سننا کبی بیداء سپهر رتبتلرنده  
امتیاز بولمش ایدی. بواسلوب نامسلوبله جنک وجدال و حرب و قتال  
اوزره سنه مزبورده صفرا مظفرینک دوردننجی کونی دخی رایات فتح  
وظفر قلاع فکرت و نظردن برتر اولوب باوری باروت فشان ایچ  
پاروقان دخی عساکر اسلامه مسخر و دسا کر بی قیاصر کبی زیر  
وزیر و بسیط قهر و تباره برابر اولوب روم ایلی عسکرندن هزار  
نامدار سو باشیلر، ویشمار پیکار گذار و پر خاشلر طوب و تفنک  
و شقالوس و زنبکدن دوشدیلر، اغنی که اول سفر ظفر اثر و مهاجمه  
هیجا کئوده شهادت یوللرینه آشدیلر. زیرا عسا کر دسا کر کشا  
نصرهم الله تعالی طرفلرندن آتیلان طوب وعد انداز و تفنک هیجا.  
ساز قلعه مزبورده باروقانلرینه کرفنار اولور قالوردی. نشیمن کفار  
و پیرامن فجاره آنجق صدالری واصل اولور ایدی. فاما زمره  
ملاعین و کفره شیاطینک تخش برقی و خش و طوب و تفنک آتش  
تشاری لابد بردایر پیل بدنه ویا برشیر مردم سر و تهمتن تنه راست  
کابوب هروجهله آتشدان قوتلری کرم و عسا کر منصوره نك یورویشی  
تابش مهر کبی بر مقدار نرم اولمشدی. آخر کار جنود جرار مانند



بحار زخار گرمیتری بی نشان و آتشدان قوتلری بی عرض دغان  
ایدوب ایچ پاروقانلری دخی آلدیلر و هزار خوریانک قاتی بسیط  
خاکه صالدیلر. (حکایت) اولورکه اول فرقه نیک رئیس قرائلک معتقدی  
آتش افروز خرمن عناء، قلعه سکتوارک بانی. سرآت اشرائک  
کاردانی (زاردنسکی) دیدکاری آدمک سنی یتشه یتش و دندانی  
خاکسار بدننده یتش ایدی. زعم فاسد نجه تدبیر و زعم مسلمینه بدل و باطلی  
اکثیر ایلیوب بر جانبیه کچه کچه التون و غروش و بر طرفه کیسه کیسه  
آچیه و فلوس منقرش قویوب کفار پیکاری و فجار ناستوده کاری زمره.  
سندن بردلیر بی ادراک که روم ایی عسکرینک برینی زخناک و طوب  
و تفنک و شقاوس و زنبک ایه هلاک ایلیه پسند بی کران و نحسین فراوان  
ایدوب آلتون کیسه سنی آچاردی و اول بدکردارک اوسته دست  
انعامه فلوری صاچاردی. فاما حین جنک و هنکام طوب و تفنکده  
قبو خلقتدن برینی اورسه و یاخود یکچیری طاقه سندن برینه زخم  
ایرکورسه اکرام بالغ و انعام سابق قیلوب غروش و آچیه لایق و انعام  
واحسانه موافق کورردی. لکن چن که شکسته تنلر و کسسته  
جوشنلر، اغنی هلاکار و زخناکار اناطولی عسکرندن و اول سمتک  
دلاورلرندن اولسه راه احسانده تردد و سمت استجسانده تغد  
ایدوب زخناکک ناتوان و کار زار مهابتدن کریزایدر دیو، دم اولورکه  
فلس احمرله کوزلرین بویارمش و کاه اولورمش که اسراف اتلافدر  
دیو همتی دریغ طونارمش. بو طریقه عساکر منصوره نیک کهان  
و مهمانی و مربرینت مقادیر و مراتب شانی معلومی اولدوغنی اعلام  
ورسم اتمالی بوسمتله اتمام و افهام ایلر ایش

( نظم )

لعنة الله على احسانه و عليه و على اعوانه  
ايرته بركون كوره احوال نولور سيم وزر مائي قتال نولور



مجلس خامس خاقان کیتی س-تاتک انتقلی و قلعه سکستوارک  
فتح نصرت مائی، خصوصاً وزیر اعظم حضر تکرینک حسن  
تدبیری و صورت ماتمک ایمن تدارکله کتم و تغیری بیاننده در

برشب انجم آسمان اوراق خزان کبی صحرای مینا نماده پریشان  
اولمشدی و آفتاب درخشان ترکس زرین کلاه کبی سبزه زار غبراده  
صارارمش صولمش ایدی . خصوصاً قلعه کوهرنیکین ضیا عسا کر نجومه  
مسخر و بقعه جیش زمین دجا گویا که سلطان رومه میسر اولمشدی .

( نظم )

لباس ماته کیرمشدی آسمان و زمین  
بهار دولت شادی صارارمش ایدی همین  
مکر طولانمش ایدی کوزدن آفتاب جهان  
فراشه دوشمشیدی درد و غم له برک خزان

ایام خزان و هنگام خسراندن سنه اربع و سبعین و تسعمائه  
صفر المظفرینک یکر می ایکنجی کوننک کیجه سی طقوزنجی ساعتده  
صاحب قران زمان ( یوم یاتی بعض آیات ربک ) مرأئنه نکران  
( ولین المملک الیوم ) وادیلرنده دوان اولوب ضفف قوتلری غایتده



وقوت ضعفی نهایتده ، رحمانی مکتبینه غالب ، عز یتساری  
 اقامتارینه حاجب ، دشمنلرک خلاصی فکرله غمنساک و عساکر  
 منصوره غربب وبی کس قالدیلر دیو هلاک ، ورد زبانی وجانب واجبه  
 تضرع بی کرانی ( واجعل لی من لدنک سلطاناً نصیراً ولوکان بعضهم  
 لبعض ظهیراً ) فحواسی اولدیغندن ماعدا های عالم روحانی، که بونجه  
 ییللر آشیانه بدنده قرار ایلمکی خوش کورمشدی ونجه دمار فضای  
 اعلاى سلطنت وسعادته کسب هواى آمال ایله کونا کون صفالر  
 سورمشدی ، اول تعلق قدیمک مقراض موتله انقطاعی واول تشوق  
 مستدیمک اعراض بدنیهدن اعراض وانزاعی هر وجهله دشوار و پر  
 اشکال وشاخسار وجود زندگانی، که آب روان روان وجویبار عمر  
 جاودان ایله ماه و سال باغ وراغ ملک بدنده منتظم الحال واخذ  
 طراوت ولطافتله مرفه البال اولمشدی . نسیم فایک خزانه وروزگار  
 بی وفایک اقترانه رضاسی . خصوصاً اجل بیمارینک دردینه وامل  
 گرفتارینک آه سردینه رضای خاطرله ابتلاسی باعث ندامت واحتلال  
 اولمش ایمن

( نظم )

مردشان جهان سلیمان خان پادشاه زمانه کی میرد  
 عالمی را گرفته بود بعدل رفت تا عالم دگر گیرد

حاصل کلام سلطان عالی رتبت وصاحب قران سلیمان منزلت جناب  
 حضرته تسلیم ودیعت وتقذیم امانت قیلوب (ربانی لایمک الانسی)  
 فحواسنی نمایان وباجمله تبعه وخدمه سنی دیدۀ نادیده ایله کریان  
 ایلدکلری حالدۀ فرمان نا گفته وسپارش نهفته لری سبقت ایتدوکی  
 اوزره مدبر بی نظیر، مشیر کبیر فراست مسیر، پادشاه جهانک صادقی،

وزارت عظمی مقامنک هر وجهله لایق ، آب روان کبی صافی دل ،  
 سرو بوستان کبی طوغروانغه مائل ، امور مشکله تحایلنده ممتاز ، هرجهتله  
 راز دار صاحب راز ، اغنی به مشیر اکرم کریم الشان ، وزیر اعظم  
 عظیم العوان ، مشکل کشا و تدبیر نما حضرت محمد پاشا جنابنه بوجکر  
 یاقیجی وجان وتن ملکینه آتش براقیجی خبرلر واصل اولدوغی کبی  
 کوکل کوزیله کریان ، قلب دیلی ایله نالان اولوب بونجه روزکار التفات  
 عالیسنه سزاوار اولدقلری پادشاه بلند اقتدار اجل هواسیله خاکسار  
 وکل کبی پریشان وتارومار اولدوغنه برمرتبه ده غمناک وبردرجه ده  
 کریبان چاک اولدیلر که تصور وتخیل اولنماز و بونک کبی ماتمک  
 وادیسنده غمدن وغصه دن صبر وتحملة یرلر بولنمز . لکن عساکر  
 اسلامک تدارکی وکفار بد نامک قوت قاهره ایله تهالکی ، علی الخصوص  
 جمله ولایت رومک ضبطی و آل عثمانک سلطنت و خلافتی هنکامنک  
 ربطی کندولرک ذمت همتلرینه فرض ، بایک لازم الادا قرض اولمغله  
 فی الحال طبع شریفلرنده مندرج اولان تدبیر وتدارک کوهرلری  
 بربر وجوده کتوردیلر وکندولر کتم اسرار وشبیه وامترادن مبرا  
 اطوارله سد اسکندر اولوب اوتوردیلر . اولا بوسره واقف اولان  
 ایچ اوغلانلرینه لازم کلن تنبیهات حکیمانه یی بالایفا بوواقعه ماتم شعاری  
 بروجهله استتار ایلدیلر که برفردک دیده توهمی تصور وادیلرنده  
 یاش دوکمک میسر اولدی و بر کیمسه نک زبان تکلمی بو حکایه دن  
 خبردار اولمغه مجال فرصت بولمدی .

( نظم )

دیل آغز ویرمدی بو حادثه دن      دیلر آغزده خسته حال اولدی  
 دله جان سوزلیه دیمک دیله من      شریله محزون بیجبال اولدی

هر قولى طولدى پنبه خشيت سوزايشتمك قى محال اولدى  
 و باجمله درون و بيرون هر بر ايج اوغلانى ملول و محزون ( هذا  
 يوم لا ينطقون ولا يؤذن لهم فيعتذرون ) مصداقچه بي زبانلار ايله هم  
 سكون و خوف و خشيت كوشه لرندة غمناك و سرنكون اولدقلرندن  
 صكره اول پادشاه غازينك نور محض اولان بدن و هيكل لطيف و كل  
 پيرهنى اوتاغ هايونده مدفون و دفيه لازم الصياحه صفتده محزون  
 قيلنوب رسم و ديعتمه خاك ريز و طلسم امانتله مسك آييز اولندينى  
 حائده بعض حالات نادیده و عبارات ناشيده تدار كنده اولديلر كه بعض  
 الهام ربانى و عين انعام سبحانى ايدو كنده ريب و اشتباه يوقدر . حتى  
 وزراء على راي و رفقاء كشور آراي دخی مرحوم و مغفورك موتندن  
 و رحلت و عزيمت و فوتندن بروجهله خبردار اوليوب دائما سلطات  
 حياتله كارمكار و عادت مألوفه لرى اوزره حلوت خصله لرندة برقرار  
 تصور ايدر لردي . بو حالت پرملالتمه عساكر منصوره يه ، خصوصاً  
 امراء مأموريه يه تخويف و تهديد صادر اولوب سالار دولت ديار « فتح  
 قلعه سكتوار بو آنه كنجه دشوار اولديغنه هر بر يميزه ختم كار  
 و اضجر شعاردرد » ديو ( يا قوم انى آخاف عليكم ) فحواينى تذكار  
 و تكرار ايتمكه و بالفعل داماد كامران و آسایش خاندانلرى اولان زبده  
 اكارم، كزیده افاخم، رفیع المراتب، منیع الجوانب، محرم اسرار لازم الاخفا  
 بوندن اقدام يكيچرى اغاسى اولان جعفر اغا محرم حرم خاص و نقاوة  
 خدام خاص اولوب صاحب قران مغفورك دست خطنه مشاكل  
 و آيين كيتابت و عبارتنه مماثل خطوط انشا ايدوب تذكرة كودر مكه  
 و مرأت ذات شريفه لرندة اشكال ماتم و ملال واحوال ضجرت



واضعال بوجه من الوجوه کورنمکه و مهم اولان مناصبک توجیهی  
ولازم اولان خدمات و دیوان و قرائت عروضک تشبیهی اجراقلنمغه  
ژنک شبهه و امترآ آینه تصور و تفکرده ناپیدا اولوب کافی الاول مهاجه  
وخاصمه مکمل و هنگام مقاتله وجدل مرور ایلین کونلردن اکمل  
اولغین سنه مزبوره صفر المظفرینک یکرمی ایکنجی کونی که تاریخ  
رومیدن ماه ایلولک یدنجی کونی که روز پنجشنبه در (الذین یجادلون  
فی آیات الله بغير سلطان) فحوالری آشکار و نمایان اولورکن ایچ قلعه  
دخی فتح اولسوب (وما النصر الا من عندالله) مضمونی سرلوحه  
فتح و ظفرده قرائت اولندی و صحیفه بشاشت غزاة اوزره (فاخذناهم  
اخذ عزیز مقتدر) آتی اقلام سیوفله یازلمش بولندی.

( نظم )

ز آواز شمشیر پولاد بر صماخ شهنشاه مغفور پر  
شپاشاب تیرو چکا چاک تیغ چو برقی که تابد بیاران میغ  
بسی نجه ازخون بدریا شده زمزجان بسی شاخ پیدا شده

حکایت اولنورکه چونکه فتح و فتوح و متون معرکه بی حل و شروح  
میسر اولوب ساحه قلعه یه کیرلدی و نشانه مرام و مقصوده اوق کبی  
ایرلدی فتنه بیدار مغبون (صراندوف) دیدکلری غرورایله مشحون  
هروجهله دلریش و سپید ریش ایکن غیرت جاهلیه بی الدن قومیوب  
برقاج دفعه ترکشی ایله آنلندی و اوقلومار کبی خانه سندن طشره چیقوب  
صورت جدال و مهابت بی مال ایله اطرافی طولندی. حتی نجه غازیله  
زخم ایر کوروب و نجه دلاورلرک اوستته آت سوروب کرکی کبی  
جرانلر و کاینیخی حرکتلر ظهوره کتوردکن صکره خواه ناخواه  
غازیلرک هجومندن کریزان و قرارگاه سابق طرفلرینه شتابان اولوب

کیتدی . آخر الامر میدان کارزارک سربازی اون بش نفر مقداری  
غازی مزبورک اوزرینه ، اغنی جایگاه مقررینه کیروب کورمشلرکه  
برمصنع کرسینک اوستنه چوکمش . اطراف وجوانبنه وافر آچه  
وآلتون وغروش دوکمش ، سوسنی اطلسلر ایله کندویی طوناتمش  
وحرارت واتهابندن سوسن کی دیانی طشره اوزاتمش . چونکه غزاتک  
قدومی وسفک خوننه هجومی بی شبهه معلومی اولمش صورت استقبال  
وانواع عزت واجلال ایله قرشو کلوب طیوقلیمش وکندی ایله  
سینجاغنی سرنکون ایدوب بصیرت وتدارک مجلسندن یقلمش . اول آن  
برغازی سربازی پیکر ضلالت سرشته تفنک انداز اولوب دل ویرانی  
کی مجروح وقلعه متینه سی کی مشروح ومفتوح قیلمغله سرناتراشیده سی  
عزاقانسه بویاتمش ولاله خزانیده سی کویاکه سر خواب فسادن  
تکرار اویاتمش .

( نظم )

تیغ تیز ایله کسالمش باشی قانه غرق ایلمش اول اوباشی  
دوزخه یاتمدن اول دون ودنی قیب قزیل اخکره دونمش بدنی  
چونکه قلعه استوار فسقه ناستواردن خالی قالدی وزراء عالی  
رای وعبا کر نصرت آرای ساحة عظیمه وقواعد قویمه سی تفرجه  
کلدی . میاننده کی کنیسه متینه که حصن حصین وقلعه کوهر نکین  
دینلسه جائز ایدی میدان غزاتک سر اندازی یشمار اهل اسلام  
وغازی بام نحوست مقامنده کندولری جلوه کر واطراف وجوانبنه  
صرف بصر ونظر قیلورلرکن ناکهانی قضای آسمانی واقع اولوب  
دروننده کی باروت اکناف قلعه ده کی آتش بقیه سندن طواتشوب یادی  
واراتک ملاتک جبروت اول آتش فروزانک دخان سیاهنده قاب قاره

بویاندی . خصوصاً بامنده بولسان غزاة علودن نردبانلر ایله عروج  
 و مخارج دائرانه شرردن جنودله خروج ایلیوب سرفرازان هیجاساز  
 دنیای دنیده دخی بلند پرواز و اخرا ده کی اعتلاء شانلری بو آشیانه  
 خاکدانیده بیلله مشاهد و ممتاز اولوب برخسارت قیامت اثر ظاهر  
 اولدی که ( لایعین رأت و لا اذن سمعت و لا خطر علی قلب بشر )  
 حکایت اولنور که غزاة شاهانک سرفرازی مرحوم سلطان سلیمان  
 خان غازینک بوحل و شرح و فتح و طرح میسر اولمزدن اول خاطر  
 شریفلری مغیر و فتح و ظفر زمانی متمد اولدوغنه مکدر اولوب وزیر  
 توانا ، مشیر بی پروا ، صداقت پیشه ، شجاعت اندیشه ، ضابط  
 الممالک بالفراصة الشاملة ، رابط المسالك بالولاية الکاملة ، عسکر  
 نواز دانا ، وزیر اعظم حضرت محمد پاشا جانبته دست خطلریله  
 تذکره هایون بلاغت نمونلری واصل اولوب مضمون مرغوبنده  
 ( شو او جاغه یانه جق دخی آلمز می و ممالک غزا و هیجاده فتح و ظفر  
 کوسلری چالمنز می ؟ ) دیو تحریر بیوردقلری اجلدن دعالری مسموع  
 جناب کردکار ورجالری مرفوع خالق جبار اولوب هم آنندی و هم  
 یاندی ، شکوفه زار دعوتلری نسیم اجابتله او یاندی . غب ذلک ، حضرت  
 پاشای کاردان عسا کر منصوره نک شه لری بی بیدان و ذات شریفلرنده  
 مرکوز اولان سطوت و صلاحی نمایان ایلیوب وزیر خامس مصطفی  
 پاشا وروم ایلی بکلیر بکیسی احمد پاشا عموماً زیر دستنده اولان  
 عسا کر نامتاهی و ایکی بیک نفر یکچیری و اغالری ایله بر ایکی بلوک  
 سپاهی کوندریلوب قلعه سکتوارک دلی و اول وادیلرده کی قلاعک  
 مشکلی اولان بوبوفجه دیمکه مشهور فتحی دشوار بر حصار نامدار که  
 سکتوارله مایینی بر یحق کونلک یولدر فتحی ایچون فرمان پادشاهی



شکونده امر عالیشان وارد اولدقده اول عساکر جرار مانند بخار  
 زخار بی کران و بی کنسار اقطار کذار و دشمن شکار اولوب سینه  
 اربع و سبعین و تسعمائه صفر المظفرینک یکر می طقوزخی کونی که  
 روز جمعه ایدی توجه ظفر رفیقله کیتدیلر، ایرتسی مقصد افسا اولان  
 سر منزله یتدیلر . دخی کار ساز جنک و آتش انداز طوب و نفک  
 اولمهدن حضرت پاشای آصف رانک حسن تدبیری و همتی و صاحب  
 قران مغفورک توجه روحانی برله همان اول کیجه قامه بویوفچه  
 بوم بوشجه قالب جمیع خوریادلری و سکنه ناشادلری باشلرین آلوب  
 قاچدیلر و زندان خوف و خطرده محتبس اولمشلر ایکن خلاص و فلاح  
 جانبلینه یول آچدیلر .

(انظم)

وزیری عاقل اولان پادشاه دورانک  
 مماتی حال حیاتی کی مظفر اولور  
 صداقت ایلجک پادشاهه بردستور  
 سوزینه فتح و ظفر قلعه سی مسخر اولور

بومنوال اوزه سهوتله قلعه آلدیلر و درت کون آنده قرار ایدوب  
 لازم التعمیر اولان یرلری انصافله عمارت قیلدیلر . بعد زان رأی عالم  
 آرای حضرت پاشا داد و ستد و ادیلرنده جلوه نما اولوب مردمان  
 حصار و حفظه و دزددار تعیین بیوروب حفظ تام ایله مضبوط و سر رشته  
 تدارکله مربوط قلندقدن صکره جانب سعادتلرنده کی غازیله و عساکر  
 نصرت مأثره فرمان پادشاهی و امر لازم الاذعان شاهنشاهیدر دیو  
 اجازت عالیلهری صدور بولوب اول کوزلری قانقمش دلیرلر و اول  
 پنجهلری غزا قانه بویانمش شیرلر تکاور اثر در هیبتلرینه سوار و تکا پوی

مهابتله آشكار اولوب بلوك بلوك فراوان ، فوج فوج نمايان ، فرقه  
فرقه كرازان ، زمره زمره شتابان كفار نا استواری جویان اولوب  
كیتدیله . برزنجیه نام پارقانه ، كه قرال ضالك محاصره سی ایله آنك  
محاصره سی مایینی قوچی یوروشی ایله بش كونلك یول وقوج یکتیلر  
عزیمتی ایله قریب الوصول ایدی ، اتصال غنیمت ماللری میسر اولوب  
سكزنجی کون اولنجه مسرت وبشاشته بروجانبه عزم ایتدیله ، خصوصاً  
اموال غنایمی عاشقلرك محنتندن زیاده کوتوردیلر و سرای بی محاسنی  
جفای معشوقان زمان کی نهایتسز کتوردیلر .

( نظم )

آتلر قاله یازدی آز قالدی      برکیدن ایکی کلدی اوچ کلدی  
کورمدی بویله آتلری دانا      کیمیمی هشت پا کیمیمی ده پا

بو غنیمت دلکشا ونصر مسرت فزادن ماعدا جنك ساز وقلعه  
کشا سابق الذکر پرتو پاشا طرفلرنده فتح ونصرت واخذ مال غنیمت  
ایله برج محکم وحصار مستحکم اغنی ( کوله ) دیدکلری قلعه وباکی اووه  
ولاغوش نام ایکی پاره قلاع مرنفعه فتح اولنوب فاما اول تاریخده  
غزات سنجاغی بکی اولوب غزاة بنام ودلیران هزیر انتقامک سروری ،  
بلکه اول گروه نصرت شکوهک کون کی بلند اختری اولان یحیی  
پاشا نورالله مضجعه اولادینک کزیده سی وجهله کبرا وعظما وروشناسان  
وباغانک پسندیده سی بالفعل استونی بلغراد والیسی محمد بك که

( نظم )

درکی نظم پا که مالکدر      معرفت یوللرینه سالکدر  
لطفی دریاسی اولسه کر پیدا      کورینور ذاتی بردر یکتا

کرمین کیمسه دن دریغ ایتیز      قپوسن دست حیف پرکتمز  
شی دکلدر یاننده باد هوا      طاغیدیر صانکه خاکی باد صبا  
مخلص ذاتی کیم و صوایدیر      هر سوزی معرفت اصولیدر  
سوزی کوهر، سخاسی دریادر      کورمین آنی عین اعمادیر  
نطق پاکندن اوکرنوب احیا      اولدی بزمنده مغتنم عیسا

رأی بی نظیر و تدبیر دلپذیری مقتضای سنجه، خصوصاً ذات شریفارنده  
مرکوز اولان شجاعت و شہامت مستعدانجه و یره ایله قلعه یه دخول  
و ر شہباز بلند پرواز کبی بر بلوک غراب روسیاه ایچنه نزول ایدوب  
آل عثمانه و خاندان جهانبانه ابا عن جد واقع اولان وقوت اخلاص  
و کثرت متابعت و اختصاص لرین موجب اولان کفتارینک تأثیری و محض  
ارشاد و تدبیری ایله کفار ضلالت مأثر و یره ایله قلعه دن طشره ظاهر  
اولدقده

### ( نظم )

کیردی میدانه تیغ لر اول دم      اولدی اعدا وجودی عین عدم  
چاق شود کلوقیرلدی دشمن دین      قانه غرق اولدی یریوزی دم دم

حتی بوجنت و جدال و هنگام قتالده مومی الیه محمد بک کفار خاکسار  
ماییننده بولنوب کندوسی دخی زخمناک اولوب انواع عواطفه  
سزاوار اولدق دن صکره قلعه مزبورده سلاک حکومت پادشاهیده باهر  
اولوب نامه مسرت اثر و حمامه نصر و ظفر فرلری واصل اولغله کالی  
نشاطه باعث و فرحت و انبساطه سبب حادث اولدق دن صکره رأی رصین  
حضرت پاشا صورت فرمان پادشاهی ایله هویدا اولوب قلعه سکتوارک  
عمارتی و خراب و بیاب اولان یرلرینک اقامتی، خصوصاً نصب حرسه



ومیرلوا وضبط وصیانت مهـابتما لازم ومهم ایدوکی آشکار اولمغین  
دامن عملریخی درمیان وقوت وقدرتلیخی مشارالیه بالبنان ایدوب  
بو، هی دخی آتام وقلعه من بوره نی تعمیر وحفظه ومیرلوا الیه عمارات انجام  
ایلدیلر . بس صاحب قران زمان ، علیه الرحمة والغفرانک ابتداء  
سلطنت واولل خلافتلرنده صادر اولان غزالی ، که فتح قلعه  
بغداددر ، اول حرفی با ، واتهـاء جلادت وصلابت وارتحال وعزیمت  
وشهادتـرنده وجوده کلن فتح نصرت آرالی که ، اخذ سکتوار  
پولادنیاددر ، اول حرفی سین اولمغله هاتف غیبی جنباندن ( بس ) لفظنه  
اشارت لاریچی در واول حرفلرندن ماعدا آخر حرفلری که ، دال  
ورادر ، ترکیب اولنسه کلام تام وبسدر ، لفظنه اشارت هدایت  
انجامدر وهـربری که ، آلتیش حرفنه مکتوب وجمله سی اون ایکی برج  
حسابی اوزره محسوبدر ، ییلک اون ایکی آی غزالینه وبروج سلطنت  
وخلافنده آفتاب کردون کی عظمت وانمارینه دال مرغوبدر . ( ع )  
» بونده چوق نکته وارد ای دانا « حقا بو ذکر اولنان خدمانک  
اداسی وبو آه کلنجه صاحب قران مغفورک اخفاسی ، ملک اقدمدن  
دور آدمه ودور آدمدن تا بودمه کلنجه بروزیر داییه میسر اولمشدر  
وبردستور کشور کشا پادشاه مرحومک نامیله بوکونه فتح ونصرت  
وظفر بولمشدر . اول ذات شریفک فراست وصداقتندن وشهریار  
مغفورک کرامت وولایتنددر که دست تصرف حضرت پاشای لشکر  
نواز وکشور کشا اولوب کویالک مقراض خشیت ایله دیلاری بریده  
وینالک رویمال دهشتله دیدملری پوشیده اولدی .

( نظم )

دیمسون کیمسه وزارتدر بو یا ولایت یا کرامتدر بو

حق بیلور صبح کبی صادق	دو جهان دولته لایقدر
فتنه دن صافلادی عثمان تختن	ویرمدی ییله سایمان تختن
حق تعالی آنی مسرورایتسون	ایکی عالمده معمور ایتسون
بیلیمزم هر نه ایسه مقصودی	هیچ دریغ ایلمسون معبودی
نوله عالی قوانی شاد ایتسه	قید غم بنده سن آزاد ایتسه
عمرم اولدقجه دعالر قیاسم	ذات پا کینه نالار قیاسم

مجلس سادس پادشاه زمانك ابتداء سلطنتی و حضرت سلطان  
سایم خانك اعتلاء خلافتی ، خصوصاً عساكر منصور دنك  
عزیمتی و خاقان کیتی ستانه مواصلتی بیاننده در

اقتضای سپهر دوار واستدعای گردش نا استوار که ، کاهی مرأت  
عالی اشکال سعادت و مسرتله تابدار و کاهی آینه خلقت بی آدمی  
انفعال و ضجرت و فنا صور تلویله آشکار ایلمکدن خالی دکدر ، هر آینه  
آیین عجیبه و قوانین غریبه سندنذر که ماتمسز مسرت ، فراقسز  
وصلت ، احتراقسز سلامت ، کریهسز کوله لر ، نوحهسز شاد اوله لر  
کسه یه میسر اولمیه .

چونکه اول مرحوم و مغفور علیه الرحمة الی یوم النشور جوهر  
حیات وزندگانیسنی بودهر فانی و بدن خاکدانیسده کم قیلادی و دبیر  
تقدیر ربانی که اول شهریار عادلک خاک ریز اولان وجودینی کارگاه  
اشباح و تعلق و هستیدن سیلادی ، عالم بر جانسز تنه و بر روانسز بدنه

دونوب سهر سلطنت جهانيانك مهر يكتاسى ودودمان دولت  
عثمانيانك شمع نور افزاسى ، داراب دارات ، سڪندر مرات ،  
هوشنك حكمت ، جمشيد صحبت ، بهمن رزم ، كيقباد بزم ، مأمون  
امان ، فريدون توان ، كيومرث كام ، سیاووش غلام ، كيخسرو ركاب ،  
كى بهمن جناب ، کرانمايه تاج ، جهان سايه باج ، فلك دستگاه ، ملك  
بارگاه ، سليم اشتهار ، سليمان مدار .

( نظم )

کشورستان ، بلند نشان ، شوكت آستان

هم نام جدی حضرت سلطان سليم خان

( اللهم ابد دولته بالقوة القاهرة وايد رفعته بالسلطنة الزاهرة ) درگاه  
اعلاسنك غبارينه بوغبار آميز خبرلرك عرض واعلامى اهمم والزم اولدقده  
تديبر قبضه سنك سيف قاطى ، وزارت سپهرينك نجم لامعى ، كارزار  
غزائك شيرى ، رزمگاه هيچانك دليرى ، خزائن سلطنتك امينى ، دقائن  
خلافتك راست بينى ، مشكلات انامك عقده كشاسى ومهمات خاص  
وعامك طريقت نماسى ، صادق الاقوال ، رائق الافعال لازال مسرورا  
بعنايته ذى الجلال ، وزير نامدار حضرت محمد پاشاى كامكار رأى  
پوشيده وتديبر ناشنیده لرى اوزره ماقعه يى عرض واعلام وامور  
سلطنت وماتمى اتمام بيوردقلى رنده كندولرك رازدار قديمى وكاتب اسرار  
مستقيمى خواجه جهان نانى ، منشيان بلاغت نشانك شانى

( ع )

فرید جمله ذی فطنت ( فریدون ) معارف فر

یوپیام ماتم شعار وكلام خلافت دئارى برطریقياه املا وانشا ایلدیلرکه



قلم دیندن غیری دیلاره نقل اولمندی و بواسرار لازم الاستار صحایف  
فکرت و تصویره رقم کبی پریشان بولمندی .

( نظم )

شویله کتم ایلدی لسان قلم ممکن اولمادی امتحان قلم  
بومنوال اوزره مکتوب مکتوم ختم بشارت ختامه مختوم قیلندقدن  
صکره ابرسرعت ، بیهیت ، هدهد هدایت برچاوش صرصر رحلت  
اولاقلق طریقله ارسال وسکتواردن کوتاهییه یالکیز سکز کونده  
ایصال اونوب مرایای خواطرک غباری و سریر سلطنت و خلافتک  
انتظاری معلوم ذهن پاکری و مفهوم طبع چالاکاری ، خصوصاً  
اول نامه صداقت نمون ( کتاب مرقوم یشهدہ انقربون ) فحوای  
شریفه مقرون اولغله اول وارث ملک سلطنت و باعث نظام سلک  
دولت احوال و انقاله خفت وزحمت ایلغاره رخصت بیوروب های  
هایون های جبال عاصیه و تلال متقاصیه قطعنه بیال و صبای  
طراوت نمون مثال نیچه بیدای شاسع و سحرای واسع طینه سریع  
الانتقال اولغله سنه اربع و سبعین و تسعمائیه ربیع الاولک طقوزنجی  
کوننده که دوشنبه ایدی مدار سلطنت مرهونه ، اغنی پای تخت  
هایونه اتصال خلافت مأللری میسر اولوب سریر سلطنت و کامرانی که  
جلوس شرف مانوسلرینه مترقب و خزانه معدات کیتی ستانی که شان  
شریف مسرت رسانلرینه هروجهله مترتب اولمشدی ، اول روز سعید  
لازم التحمیدده

( نظم )

بردری دریادن آلوب درکنار ایتدی همان  
قالمدی طوفان غم ، خیزاب ماتمدن نشان

فلک شاهی دست قدرت ، هر کوردک انکشتدر  
 پادشاه دهری ال اوزره طوتار بحر روان  
 بندن اول سن کنار ایتدک دیو اول سبروری  
 تخت شاهی قیلدی فلک بحره رشک بی کران  
 تخت سلطانی به تقدیم ایتدی کشتی تخته سن  
 بویله بولدق روزکاری بویله در دور زمان

حمیه قسطنطنیه ، صانها الله عن البلیه ، بوججهه جلوس هایونلری  
 وقدم شریف خلالت نمونلری ایله مشرف اولدقده مناشیر صلابت  
 رسان وطوامیر بشارت عنوانلری اطراف واقطاره وممالک واقالیم  
 ودیاره روان اولوب تبدیل سکة شاهی وتحویل خطبة پادشاهی فرمان  
 اولدقده میرمیران اولان ذوی العنوان ومیران اکناف آبادان  
 زور بازوی قوتلرینی آشکار وروی نیروی شجاعتلرینی بساط  
 تدبیر همته القا ایدوب سلاک حکومت خسروانده کی مسالکی ومملک  
 خلافت پادشاهانده کی ممالکی هروجهه محفوظ ومصون ومکرهان  
 وفتنة بیداران اولان اشرانک مضرت وکزنددن محروس ومأمون  
 ایتدکلرندن ماعدا اشرف بلاد واعظم سواد اولان خطه بنام  
 وحیاطة لازم الاحترام ، اعفی شام واجب الاحتشام ، که اطراف  
 وجوانی دشت سواران واکناف وسباسبی عربان عربده جویان  
 اولوب هروجهه سرحد ولصوص ومفسدینی لایعد ایکن سرات  
 نادره دانک دانایی وثقاة عظاما وروشنا-انک کشور آراسی وزیر علی  
 شجاعت ، مشیر عمر فراست ، وقور صاحب کلام ، دستور بلاغت پیام ،  
 آصف صفوت ، ارسطو سطوت ، شنوده کفتار ، ستوده اطوار

والا ولا ، لائی ادا ، بالفعل وزیر افخم اولان لالا . صعلقی پاشا اول  
تاریخده حاکم شام و میر میران لازم الاحتشام اوغله تیر تدبیرلری یوتنه  
اصابت پیوسته و تیغ شهامت شهرلری میان حفظه و حراسته میان  
بسته ، خصوصاً برآیدن زیاده گاه سوار و گاهی پیاده ماه غلبه کتی  
شهر ایچنی کشت و گذار و شام تا سحر اسواق شامی حیانت یشمار  
ایتدکلری سیدن

( نظم )

فته بیدار لر کوز آچه مدی قالدی سر خواب خوف و خشیتده  
شویله یاندی مشاعل تدبیر قالدی کسه کنج ظلمتده  
خصوصاً تاریخ مزبورده قیودان و سر لشکر نصرت و ظفر عنوان  
اولان اکرم وزرا ، افخم عظماء ، دریادل ، عارف بی معادل ، آتش  
انداز جزائر و قلاع و نعره پرداز نواحی و ضیاع ، داماد پادشاه کیتی  
پناه و سر حلقه غزاة ظفر دستگاه . فلک فراستک نوحی . فلک  
صداقتک روشن قنوجی ، پیاله کیر بزمگاه غزا ، وزیر نالت پیاله  
پاشا بعض جزائر لشکر چکمشلر و فرنگستانک بوادی تصرفه  
ار دوکمشلر ایدنی .

( نظم )

یمن جلوس شاه جهانک سرائی دیکمشدی هریره علم فتح و نصرتی  
والحاصل اوچ کون تمام استراحت و آرام بیوریلوب نادره دان ،  
فیلسوف زمان ، علامه قدرت ، ز محشری فضیلت ، سیدالعلما ،  
سندالفضلا ، عقده کشای انام ، مایجاء و ملاذ خاص و عام ، قطب  
سهر فضائل ، محور فلک خصائل ، شفا تحریر ، تحریر لازم التوقیر ،



اغنی به مفتیؑ پر جود حضرت ابوالسعود لارال مسعوداً بیکارم  
الوجود وسائر موالیؑ عظام و پای بوس تحت سلطنته سزاوار  
اولان اہالیؑ کرام موہبت تقبیل ایلہ تجیل اولندقلرندن صکرہ  
بوجہ الاستعجال ، لایطریق الامہال تحتکاه ثانی وخطہ شکارستانی  
اولان محروسہ ادرنہ حرسہاللہ عن فترات الازمنہ شرف قدوملریلہ  
مسعود و موہبت وجودلریلہ محض مکارم و جود اولندقدن صکرہ

( نظم )

عزم ایتدیلعسا کرہ عرض جمالہ یوللر دہ کہ عطا ایلہ کاهی جلالہ  
همسایہ لر خواص ایدی انجق رکابده آز قالمشیدی ذرہ پی آفتابده  
والحاصل کاهی خواجہ ادیب ، فاضل لیب ، حاتم کف ، سیدشرف ،  
سعدالدین دوران ، ابوالسعود زمان ، محض عطای آلہ ، اغنی عطاءاللہ  
افدی ایلہ شیرین موانستلری و کاهی عارف موشکاف ، کامل کمال  
اوصاف ، مصنع کلام ، مرصع پیام ، خیالی خیال ، ہلالی مال ، اغنی  
جلال بک ایلہ رنگین مصاحبتلری سبقت ایدوب آخر الامر نیچہ  
کوندہ بلغرادہ وصول و مرحوم و مغفورك اوتاغنه نزول و دخولاری  
میسر اولوب بوجانبده دخی والاقدر ، اعلا صدر ، بوبکر خلقت ،  
عمر عدالت ، عثمان دیانت ، علی شجاعت ، دافع الاشکال باحسن الحال ،  
رافع الاختلال باملح القال ، دستور اکرم ، آصف اعظم ، مشیر  
محترم ، وزیر محتشم ، اغنی بہ حضرت محمد پاشا کر نامتناہی یہ  
رہنما وجیوش منصورہ شہنشاہی یہ پیشوا اولوب فقار افار و سفار  
سفارلہ سکتوار جانبلرندن منفصل و مرحوم و مغفورك جسم  
بی روحی ایلہ جان عالمہ متصل اوانجہ کاهی لباس حیاتلہ نمایان

و کیندولری عربہ یا ننجہ احیاناً روان اولوب بروجه ایله اخفا و سر سترله  
 ناپیدا ایلدیلر که هر کشتی مرحوم خداندکاری زنده صانوردی، صحت  
 موتنه واقف اولنلرده بو اوضاعی کورسه صحتنه اینانوردی. القصه  
 قرق درت کونه دک مخزون و رسم و دیعتله مدفون اولندقدن صکره  
 خاکدن بیرون و عربہ تابوتنده صاحب سکون قینوب شو زمانه دک که  
 بلغراده برقوناق یا قلشیدیلر عساکر منصوره سلطان کیتی ستان حضرت  
 سلطان سلیم خان قدومندن خبردار اولوب بر مقدار شاشیدیلر.  
 والادخی مرأت تصورلری غبار شکدن قورتلمدی و آینه نفکرلری  
 ژنک امتزادن مبرا اولدی. آخر الامر عساکر بی کران، سواران  
 ونا سواران ایرتمسی اوتاغ هایون اطرافنده خیمه زنان اولدقلرنده  
 سلطان جهان اوتاغه کیرمش واسباب سلطنت و خلافت صاحبه واصل  
 اولمش بولنوب بی شبهه جان عالم معلوم و میت مبهم ظاهر و مفهوم  
 اولدینی کبی.

( نظم )

عسکر کریه آقن صالیدی همان عسکرک اولدی کوزی یاشی روان  
 عربہ اشک فراوان ایچره کشتی نوح ایدی طوفان ایچره  
 تختدن آیریلوب اول شاه جهان اختیار ایلدی بر تخت روان

والحاصل عساکر ملامت نمون ملول و محزون و مغبون و صباخ  
 مغفور محزون ( انک میت و انهم میتون ) خطابه مقرون، وزیر  
 نادره دان حضرت پاشای کاردان ایسه مرحوم و مغفورک روحانیتندن  
 و پاشای کیتی پناه حضرت تلرینک التفات و عزتندن ( هذا يوم ينفع  
 الصادقين صدقهم ) اشارتیه منظور العین. زهی تدبیر و بصیرت افکار  
 ( ان فی ذلك لعلیه لا ولی الا بصار )

( نظم )

خصوصاً شاه عالم طوتدی ماتم جهان سلطانه حزن اولدی محرم  
آکوب ایامی مرحوم شاهک شب تارنده قالدی دود آهک  
قتی نادر درای غافل بو. حالت کله بریره شادی و ملامت

وقتی که مکنت و جلادنه مقیم و سراچه توکل و تحملده مستدیم  
اولدیقی کوردیلر، غزات بی وهم و بیم ( اذ جاء ربه بقلب سایم ) تلاوتی  
ایله اول شهریار لازم الاحترامک خاک پای رخشنه هر وجهله تعظیم  
و تکریم جبهلرینی سوردیلر. چونکه اول اوتاغ سعادت قرین و بونجه  
خزائن کران واپسین شرف نزوللریله مشرف اولدی و قدوم  
میمنت دخیوللری ایله اولیکیدن زیاده شرف بولدی، همان اول کون  
وزراء، عظماء و علمای کبرا ماتم جامه، مبرز عمامه اولدقلرندن ماعدا  
پادشاه سلیمان اورنک دخی بی صبر و قرار و بی درنک شمل حزن  
و غمی اظهار و شمله ماتمی اختیار بیوروب صلات مغفوری اوتاغ  
اوکنده ادا و جناب واجب الوجوده دعا لرینی معروض و آنها قیلدقلری  
کی بلا تأخیر و اهمال مرحوم و مغفورک میتنی ارسال و محمیة  
قسططیهیه ایصال ایچون فرمان واجب الامثاللری اوزره وزیر عالی  
جناب احمد پاشای کامیاب و اول غزای نصرت مآلده دعوت  
و اشتغالیله استمداد بی مثال اولان عمدة الزهاد، قدوة العباد، فاضل  
متصوف، کامل متصرف، سر حلقه سالکین، سر چشمه واصلین،  
علوم ظاهره نک ممتازی و فنون باطنه نک کاشف رازی، چراغ افروز  
مجلس یقین شیخ مصاح الدین بن شیخ نورالدین دامت ارشاده کادارت  
اوراده و مرحوم شهریارک منظوری، افخم و اکابرک مشکوری،  
مرئی باغا فرهاد اغا و بعض خدام و خدمه لازم الاحتشام قوشیلوب منزل



معهوده مقرون و جامع شریفی جوارنده مدفون ایلدیلر ، رحم الله  
 علی من قال ( رحمه الله فی جمیع الحال ) . بعدزان سلطان جهان  
 وشهریار فرمان ران ایرتسی مهر سپهر برین تابان وخیایای زیر  
 زمین نمایان اولدینی کبی دیوان و جمعیت روشناسان بیوروب اکابر  
 واعیان وعظمای عالی شان یوللو یولارنجیه وقوللو قولارنجیه پای  
 بوس سریر سلطنتله خندان ومشاهده طلمت پادشاه زمانله کامران  
 وشادان اولدقلرنده

( نظم )

ز کوس سعادت برآمد صدا که ای نامداران دشت غزا  
 بر آراست سلطان سایم دوم سریر سعادت پی اشنلم  
 جهان توجیهانی چو برکطری طراوت گرفته همه سرسری  
 نقاره شنید از شکافه درست شده زنده سلطان سایم نخست

بومنیوال اوزره عین انعامی بیدای همته جاری وزلال نوال  
 احسانی دریغ وادیلرندن عاری اولوب عساکر بی کران مکارم  
 بی غایلرندن بهره دار و جنود بیکار کران بخشش بی پایانلرندن ( اولئک  
 لهم رزق معلوم ) فحواسنجه کامکار اولدقدن صکره جایگاه سلطه  
 عزیمت وتختگاه خلافت توجیه ورحلت بیوریلوب مرور ازمنه وعبور  
 عونیه ایله وصول ودخولاری میسر اولدقده

( نظم )

ینه دریای عسکرایتدی خروش ینه روی زمینی طوتدی جیوش  
 سپر آینه سی ضیا ویردی تابش مهردن غنا ویردی  
 کیدی یوکلکواسکوفن مردان نیجه قویروقلی یلدز اولدی عیان  
 وشنه رخساره پر اولدی هوا کوکده ایشندی حضرت عیسا

والحاصل وزرا وعظما وکبرا وعلما ، خصوصاً اعیان وارکان  
ودفترداران وروشناسان ، لاسیما سراسر پوش ، صرصر خروش  
چاووشلر ودریارو ، نسیم پیرو یکیچریلر خرامان وکذاران ، صولاقلر  
شتابان ، جلوه کنان ، بیکار مرصع رخت ، مساعد بخت ، سپاهییلر  
تیغ کیر ، تیر تدبیر ، سلاحدارلر جنک شناس ، سرنگ لباس ،  
علافه جیلر جگر دران ، دلاوران ، غریب یکیکیلر ، صدای شپور  
ونفیر ونوای سوزنای صور تأثیرله صف صف ، طرف طرف ،  
فرقه فرقه ، زمره زمره سواران وناسواران برپادشاه جهانپناهی  
درمیان ایلمشلر که

( نظم )

ربع مسکون آنکله آبادان یدی اقلیمه حکمی اولدی روان  
ظل بقدر ، سیحاب همتدر خوش کچر سایه سنده خلق جهان

بوموال اوزره زیب وزینت وشکوه وشوکت ایله سرای عامرملری  
تشریفه نیت وعزیمت بیوردقلرنده عامللر ، کامللر ، فاضللر ، عاقللر ،  
دانالر ، مشکل کشالر ، دیانت بزمنک شمعملری ، فراست شمعنک  
لمعلری ، ارکان دینک عمادلری ، بوستان یقینک شمشادلری ، بزرک  
دستارلر ، مابه الافتخارلر ، سترک آستینلر ، بلاغت کزینلر

( نظم )


هربری برکاردان فیلسوف باشدہ نعمانی عمامه تنده صوف

بونلردن ماعدا اعیان ولایت وکبار وصغار رعیت چوق چوق  
دعالر ، فصل فصل شار ایله استقبال وهروجهله اعزاز واجلال  
صدنده ایکن ناکاه بر بارگاه سعادت پناه ودرگاه عظمت دستگاه

صدف وار اول کوهر یکتانک قدومه آغز آجدی وعسا کر  
بی کران آنک جالنتی کورنجیه کندودن یکدی وبالجمله ( مفتحة  
لهم الابواب ) سنه مزبوره ایامندن بر مبارک کونده تکرار تحت خلافت  
وسریر سلطنت و مسرت جلوسیه کامکار و کامیاب اولدی .

( نظام )

ظلیدر یریوزنده اللهم  
کونی کوندنیک اولسون اول شاهک  
فتح عالم میسر اولسون اکا  
جند آدم مسخر اولسون اکا  
ایر مسون هیچ بونسل یا که زوال  
کوزلسونلر جهانی چون مه وسال



محاسن سابع سبب تألیف و تسطیر و خاتمه رساله نادرالظیر  
على الخصوص مؤلفك عرض حالى و عالى حقیق بخت  
ناشادندن شکایت پرملالی شرحنده در

بردم که ، شدت شتا چیزار عالی خشک و مضرت سرما آشیانه  
بابلی پرواز گاه کنجشک ایتشدی ، خصوصاً برق و باران زمین و آسمان  
مایینه برودت براقشدی . و آسیب بر سر زمستان چوق نهال  
کرازانی آتشگاه غربت وفاده اوده یاقشدی .



( نظم )

آفتابك پندی تأثیر ایلمزدی صر صره  
ایر کورردی بر فله خاکیلره قاره یره  
بخ دکل بامک کنارنده کورندی دیشلری  
خنده قیلدی خانلر آچازدن مردملره

آنک کبی ازمان سرد و اوآن یخ و برده کلیولی خاکنک  
حاصلی و معارف کلسه اتانک واصلی ، مصطفی بن احمد نام بو حقیر عالی  
شهر و عالی کلام ملازمت دیوان سلطان و مواظبت آستان کیتی  
ستان نیتی ایله محروسه سنیة محمیة بهیه ، اعنی بلده قسطنطنیه مجاور لرندن  
اولش ایکن

( نظم )

نه مجال اولدی عرض حال قیلهم	عرضی عرضه اشتغال قیلهم
نه مربی بولندی کیم ایله ده	بنی دیوان شاهه واصل ایده
مانع رزق اولوب حجاب بکا	هرکز اولمادی فتح باب بکا
بریکا شدت شتاستمی	بریکادن غریبک المی
اودونی اود بهاسنه آلدیم	وارلغم خرمنینه اود صالدم
آتلیک و شنه بی ایدوب تأثیر	اوینادوب شعری فیکرم اولدی شعیر

و بالجمله نیچه زمان بو طریقله تحیر کنان و بیت اخرانمده نالان و معیشت  
مجلسنده سرکردان ، خصوصاً در درج عظمت و درّی اوج خلافت ،  
مردم دیده عالم ، مخدوم پسندیده بنی آدم ، وارث ملک جهان ، باعث  
امن و امان ، فلک رفعت ، ملک سیرت ، آفتاب رتبت ، افر آسیاب  
شوکت ، نوین فریدون قدر ، نواین هایون صدر ، عثمان بخت ، سلیمان  
تخت

( نظم )

اولدی عالی قیوم ثنا خوانی      خاطر همچون سوبندریک آنی  
بهره مند اولمه سینه همت ایدک      آخه سینه بدل زعامت ایدک

مضموننه مقرون شفاعت نامه هایونلری محفوظ و مخزون ، دل  
ویرانم ایسه ملول و محزون اولوب طوررکن هاتف غبی جانبدن  
اشارت و ملهم لاری قبلندن بشارت اولنوب

( نظم )

دیدیلر معرفت رفیقکدر      عرض قدرت یولک طریقکدر  
ایله انشا کهرلرین پیدا      دکلسون آنی حضرت پاشا

بوالقای سبحانی والهام ربانی مقارنتی ایله نادره زمان ، العجوبه  
دوران ، اغنی فتح قلعه سکتوار واول کونلرده ظهوره کن تدابیر  
کرامت شعار سراپا املا وانشا قیلنوب صحیفه عالمده برقرار  
وجریده قلوب بی آمده برکنار و یادکار قیلنقی مرام اولندی که  
نیچیلر باعث عبرت و محض پند و نصیحت اولوب امور وزارت  
وجهانداریده بونک کبی برکار صعوبت شعار و دشوار ظاهر اولدقه  
اکاکوره تدبیر و حوادث مشکله تسهیل و تیسیر ایلیه لر . بومنوال  
اوزره خامه بصیرتم دربنان و مدار بضاعتم دریا کبی فراوان ایدوب  
( هفت مجلس ) نام بررساله بلاغت انجام سمت تصنیفه اتمام اولدی  
وسمط تألیفه جواهر معانیسنده انتظام بولندی .

( نظم )

هفت مجلس هنر فیکاریدر      خطی شبدر بیاضی کوندوزدر  
سرخ ایله حل ایله یازلسه اگر      باغ نثره به اردر کوزدر  
بویدی مجلسک نفاستی خود      سگری اولمغله آز اوزدر

امید وارم که اول سپهر وزارت ، ماه فلك عظمت و جلادت ،  
 اعنی به حضرت پاشای اعظم ، دامت سعادتہ بمواهب المکارم والمہمم ،  
 بوفت مجلسك مقدارینی سبع سماواتدن برتر و عالی قولارینك  
 اشتہارینی بو واسطہ ایله کون کبی روشنا وانور بیورہ لرده

( نظم )

ایلدم زنده نام پاشایی ساعت حشره دك قیامتہ دك  
 چوققیدرہمت ایتسه دیرلکمه تا اوتوز قرق بیك زعامتہ دك

بنم کبی خاکسار و بندہ زار و نزار قلت اعتبار و کثرت افتقار  
 ایله بذل اقتدار ایدوب خزانه ذہنمدہ کی معانی کهرلرینی تحصاف  
 وزوایای فیکرت واشتغالدہ نیچہ کونلر ریاضت و اعتکاف ایلدم .  
 حاشا کہ مکارم سپهرینك نیری ، مراحم دیارینك خیری ، الطاف  
 بحرینك کوهری ، احسان فلکبارینك مهر انوری ، عطا بزمینك  
 صدری ، سخا مجلسینك والاقدری ، آصف اکرم ، مشیر افخم ، سری  
 اعلم ، جری احکم ، وقور محترم ، دستور محتشم ، باعث نظام عالم ،  
 ہمنام کزیدہ بنی آدم ، حضرت وزیر اعظم و معظم لازال محفوظاً  
 بعنایہ اللہ الاعلم اومدیغمدن زیادہ رعایتلر وزعامتدن فضله ہمتلر  
 و عنایتلر بیورمیلر .

( نظم )

کرك آغلات کرکسه شاد ایله آستانك ترا بیدر عالی  
 نظر ایلر سہك آ کہ سلطانم ذاتی نامی کبی اولور عالی  
 کراوقورسہك جواہر سخنی شہسز منتظم اولور حالی  
 باری خدا جل و علا حضرتلری اول وزیر دانا و مشیر کشور آرا



حضرتلرینک لباس دولتی دائم و اساس رفعتی قائم ، عمرینی دراز ،  
 ذات پاکی محرم راز ، اولادینی بر خور دار ، نوردیده لرینی کامیین  
 و کامکار ، اتباعی شادان ، منسوباتی خندان ، قولارینی بر مراد ،  
 حضور و رفاهیتارینی زیاد ، دشمنارینی هلاک ، عدولرینی غمناک ،  
 بدخواهلرینی مقهور و مهوم ایلیه .

( نظم )

آمین بحق صحف قرآن    آمین بحق فخر عدنان  
 آمین بحق آیت فتح    آمین بدان روایت فتح

\*  
 \*\*

اومارم یردن کو که حظ ایدم اول عالیجناب  
 چکدم آکا « هفت مجلس » نام بر اعلی کتاب  
 هفت مجلسدر ولیکن هشت جتدن نشان  
 هفت یمدر صانهسک هر بر سوزی در خوشاب  
 هفت مجلس نه فلک یرنده اولسه فی المثل  
 بکر مغیلر قمردر ، نور اذعان آفتاب

تم

۱۸۷۱ء کا دورہ

بیت

۱۸۷۱ء کا دورہ





## کتابخانه اقدامک نشر اولئان اجزاسی :

- ۱ (اوصاف و معجزات نبی) شعرای اسلافدن عیبیدی مرحومک متروکات قلمیه سندن برسالة منظومه در. اوج فورمه دن متشکل اولوب فیاتی ( ۵۰ ) پاره در .
- ۲ (جنان الجنان) اسلاف شعرا دن واحدی مرحومک بعض احادیث واقوال اکابر اسلامییه بی شرح صورتیه منظوم ترجمه سیدر. سکن فورمه دن متشکل اولوب فیاتی ۱۰۰ پاره در.
- ۳ (مرآة الممالك) سیدی رئیسک هندستان دن اعتباراً قره دن اجرا ایتدیکی سیاحته دائر سلیمان قانونی به تقدیم اتمش اولدینی لایحه در . فیاتی ۲ غروشددر .
- ۴ (احسن الحديث) اوغنی زاده نك حدیث اربعین شرحی
- ۵ (دیوان ابن کمال) علمای ترک دن علامه بی مدانی کمال پاشا زاده نك آثار منظومه سنی حاویدر .
- ۶ (عثمانی تاریخ و مورخلری) اکابر مورخین عثمانیه نك تراجم احوالیه بعض مطالعات تاریخیه بی حاویدر . ایکنجی دفعه اوله رق طبع ایدلشددر . بهاسی ۳ غروشددر .
- ۷ (الرق فی الاسلام ترجمه سی) عربجه دن مترجم واسلامیتده کوله لکدن باحث مهم برادر در . بهاسی ۲ غروشددر .
- ۸ (ملاحظات ادبیه) اسماعیل صفا بکک اثریدر . بهاسی کذلک ۲ غروشددر .
- ۹ (تذکره لطیفی) قسطنطنیولی لطیفی مرحومک اثریدر . فیاتی ۷ غروشددر .
- ۱۰ (فقه اکبر ترجمه سی) امام اعظم حضرت نرینک مؤلفات جلیله سندن اولوب مرحوم مستقیم زاده طرفندن ترجمه اولنشددر . فیاتی ۴۰ پاره در .
- ۱۱ (ترکاربک علوم و فنونه خدمتی)
- ۱۲ (محاکمة اللعین) علی شیر نوائینک آثار مشهوره سندن در . اصلی اولان چغتایجه سیله لهجه عثمانیه ترجمه سی ده برلکده در . فیاتی ۳ غروشددر .
- ۱۳ (تذکره البیان) متقدمین ارباب قلمدن (ساعی) مرحومک اثری اولوب قوجه معمارستانک ترجمه حالیه آثاری حقنده معلومات کافییه بی حاویدر . فیاتی ۲ غروشددر .
- ۱۴ (الک اسکى ترک یازیسی) ترکاربک اسکى یازیلرینه دائر معلوماتی حاویدر . نجیب عاصم بکک مؤلفاتنددر .
- ۱۵ (تذکره سالم) سخنوران اسلافک تراجم احوالیه دئر یازیلان تذاکر شعرا میاننده قیمتشناسان ادبک الک زیاده اهمیله تاقی ایتدکاری (تذکره سالم) برقاج کتبخانه دن باشقه بریرده بولنه مدینی ایچون برچوق کیمسه لر بونک مطالعه سندن محروم قالمده ایدی. اخیراً مطبعه مزجه مذکور تذاکر شعرا دن اک مهملرینک بی درپی طبع ونشرینه باشلانلمسی اوزرینه (تذکره سالم) دخی مصحح ومکمل برصورتده طبع ایدیلدرک موقع انتشاره وضع ایدلشددر . فیاتی ۱۰ غروشددر .







3 1761 07130384 6

'Alī, Mustafa ibn Ahmed  
Heft meclis .

DR  
507  
A4